

MESYUARAT KEDUA, PENGKAL KETIGA
PARLIMEN KEEMPAT BELAS
2020

HARI SELASA : 11 OGOS 2020

JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 12 HINGGA NO. 56)

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA ,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SERI UTAMA HAJI MUKHRIZ
BIN TUN DR. MAHATHIR [JERLUN]**

TARIKH : 11 OGOS 2020 (SELASA)

SOALAN

Minta **MENTERI BELIA DAN SUKAN** menyatakan langkah-langkah mencergaskan semula aktiviti sukan dan rekreasi :

- (a) Malaysia sedang membuat **persiapan atlet ke Sukan Olimpik**. Bagaimana dengan **latihan bakat muda atlet negara**; dan
- (b) kesan pandemik COVID-19 ke atas sukan-sukan bertaraf antarabangsa. Adakah **sukan ternama, khususnya Iron Man Langkawi, Langkawi Regatta, Triathlon dan Duathlon akan diteruskan pasca COVID-19**.

JAWAPAN

Tuan Yang di-Pertua,

1. Kementerian Belia dan Sukan (KBS) melalui Majlis Sukan Negara (MSN) dengan kerjasama Persatuan Sukan Kebangsaan (PSK) dan Institut Sukan Negara (ISN) sedang mempersiapkan atlet-atlet di bawah **Program Podium ke arah temasya Sukan Olimpik dan Paralimpik Tokyo 2020 (2021)**. Sehingga kini, seramai 12 atlet olimpik dan 14 atlet Paralimpik

NO. SOALAN : 12

telahpun berjaya melayakkan diri melalui kejohanan-kejohanan kelayakan yang telah diadakan. Manakala seramai 23 atlet olimpik dan 13 atlet Paralimpik akan mengikuti proses kelayakan sehingga bulan Jun 2021 nanti. **Program Podium ini terdiri daripada 575 atlet yang disasarkan untuk melayakkan diri ke temasya Sukan Asia, Komanwel dan juga Sukan SEA akan datang.**

2. Selain atlet kebangsaan, tumpuan turut diberikan kepada pembangunan atlet-atlet muda di kesemua **14 negeri menerusi Program Pelapis Negeri dan Program Bakat**. Pelaksanaan **Program Pelapis Negeri** adalah menerusi peluang latihan yang sistematik di peringkat negeri bagi atlet muda berumur di bawah 21 tahun untuk beraksi di Temasya Sukan Malaysia (SUKMA) yang diadakan setiap dua tahun sekali. Temasya ini penting dalam usaha melahirkan lebih ramai atlet berbakat dan berpotensi untuk dibawa ke peringkat yang lebih tinggi, secara amnya Sukan SEA, Komanwel, Asia dan juga Sukan Olimpik. Jaguh-jaguh negara seperti **Nur Dhabitah Sabri, Pandelesa Renong (Terjun), Lee Zii Jia (Badminton), Jupha Somnet (Berbasikal), Amy Kwan Dict Weng (Gimrama), Khairulnizam Mohd Afendy (Pelayaran)** dan ramai lagi merupakan produk Program Pelapis Negeri.

3. Selain itu, **Program Bakat** yang merupakan proses pendedahan latihan awal bagi bakat-bakat muda berumur di antara 13 hingga 15 tahun turut dilaksanakan di peringkat daerah.

4. Program-program ini adalah usaha sama secara kolektif antara MSN, Majlis Sukan Negeri, Persatuan Sukan Negeri dan pemegang taruh yang lain. Antara perkhidmatan yang disediakan oleh MSN bagi pelaksanaan program-program tersebut adalah dari aspek kejurulatihan dan penganjuran pertandingan. Melalui usaha-usaha yang telah dilaksanakan setakat ini, seramai **5,021 orang atlet, 319 orang jurulatih daripada 244 buah Pusat Latihan Negeri (PLN)** telah berdaftar di bawah program Pelapis Negeri dan bagi Program Bakat pula, sejumlah **1,571 orang atlet, 119 orang jurulatih di 115 buah Pusat Latihan Daerah (PLD)** telahpun

NO. SOALAN : 12

mula menjalani latihan secara separuh masa berdasarkan SOP yang ditetapkan Majlis Keselamatan Negara (MKN).

5. Selain itu, **Program-program Khas** turut diwujudkan seperti Program Pembangunan Bola Sepak Negara (PPBN), Program Pembangunan Ragbi Negara (NRDP), Program Pembangunan Hoki Negara (NHDP) dan Junior Cycling Malaysia (JCM) bagi membangunkan lebih ramai pemain-pemain berkualiti di peringkat akar umbi.

6. Wabak pandemik COVID-19 yang telah melanda dunia termasuk Malaysia telah merubah ekosistem serta aktiviti sukan dari peringkat akar umbi sehinggalah ke peringkat antarabangsa. Program latihan dan penganjuran kejohanan-kejohanan yang terpaksa ditunda ekoran penularan wabak ini kini telah mula dibuka secara berperingkat-peringkat selaras dengan SOP semasa yang telah dikeluarkan oleh Majlis Keselamatan Negara dengan pengamalan norma baharu. Namun begitu, penganjuran pertandingan dengan penonton dan kejohanan bertaraf antarabangsa masih tersenarai dalam **aktiviti dilarang Majlis Keselamatan Negara** buat masa ini dan akan dibawa untuk pertimbangan fasa-fasa pembukaan sektor sukan dan rekreasi yang seterusnya melihat kepada situasi pengawalan pandemik COVID-19 di Malaysia dan seluruh dunia.

7. Ini secara tidak langsung telah menjejaskan bukan sahaja penganjuran sukan antarabangsa seperti yang disebut oleh YB Jerlun seperti **Iron Man Langkawi, Langkawi Regatta, Triathlon dan Duathlon**, malah semua jenis kejohanan sukan dan acara yang melibatkan peserta dari luar negara kerana ini melibatkan **dasar kerajaan mengenai sempadan negara yang masih ditutup**. Dasar pembukaan sempadan negara bukan di bawah bidang kuasa Kementerian Belia dan Sukan, tetapi tertakluk di bawah MKN dan Mesyuarat Khas Menteri-Menteri mengenai Pelaksanaan PKP yang dipengerusikan oleh Menteri Kanan Pertahanan, YB Dato' Sri Ismail Sabri Yaakob. Selain itu, kejohanan tempatan yang melibatkan **penonton dan yang melibatkan peserta yang ramai (mass-gathering)** juga tidak dibenarkan lagi setakat ini sehinggalah keadaan

NO. SOALAN : 12

mengizinkan dan dibenarkan oleh pihak MKN, KKM dan Mesyuarat Khas Menteri-Menteri tersebut tadi.

8. Antara Kejohanan Sukan Antarabangsa di Malaysia mahupun di luar negara **yang telah dibatalkan atau ditunda pada tahun ini** seperti **MotoGP di Malaysia, Thailand dan Argentina** yang terpaksa dibatalkan akibat wabak COVID-19. Selain itu, **Liga Bola Sepak Australia A-League** juga telah ditunda akibat peningkatan kes-kes COVID-19 di **bandar Melbourne**, dan juga **V-League di Vietnam** yang telah ditunda akibat penularan situasi wabak COVID-19 di **Da Nang, Vietnam. Piala Thomas dan Piala Uber Badminton** juga telah ditunda sebanyak dua kali dan kini dijadualkan secara *tentative* pada bulan Oktober di Denmark.

9. Walau apapun, saya memahami bahawa kejohanan **sukan bertaraf antarabangsa mampu meletak nama negara di mata dunia dan juga membawa impak positif dan sumbangan kepada ekonomi negara** khususnya kepada industri sukan dan industri pelancongan tempatan, akan tetapi dalam situasi luar biasa (*unprecedented*) COVID-19 ini, keselamatan dan kesihatan atlet / peserta negara, krew dan semua yang terlibat menjadi keutamaan dan kepentingan negara. Sama-sama kita doakan dan saling ingat-mengingati untuk sentiasa **mematuhi arahan MKN dan KKM agar keadaan bertambah baik dan terkawal** agar sektor sukan juga dapat dibuka dan kembali rancak seperti sedia kala kelak, InsyaAllah

Sekian terima kasih.

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL KETIGA
PARLIMEN KEEMPAT BELAS (2020)**

PERTANYAAN : LISAN

DARIPADA : DATO' SERI HAJI IDRIS BIN JUSOH [BESUT]

TARIKH : 11 OGOS 2020 (SELASA)

SOALAN

DATO' SERI HAJI IDRIS BIN JUSOH [BESUT] minta **MENTERI ALAM SEKITAR DAN AIR** menyatakan status projek pembinaan dan membaik pulih benteng pemecah ombak di Kuala Besut melalui pelaksanaan projek Gerbang Pelancongan Antarabangsa Besut.

JAWAPAN

Tuan Yang Di-Pertua,

1. Di bawah RMKe-10, Kerajaan telah meluluskan Projek Pemuliharaan Muara Sungai Besut, Terengganu untuk dilaksanakan oleh Kementerian Alam Sekitar dan Air (KASA) melalui Jabatan Pengairan dan Saliran (JPS) dengan siling kos projek sebanyak RM238 juta.
2. Projek ini lewat jadual di mana status pelaksanaan kerja-kerja fizikal di tapak adalah sebanyak 64% berbanding jadual sebenar 85%. KASA melalui JPS sedang memantau rapi projek ini dan akan mengambil langkah yang sewajarnya bagi memastikan projek ini dapat disiapkan dalam tempoh pelanjudan yang telah ditetapkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE TIGA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB TUAN HASANUDDIN B. MOHD YUNUS (HULU
LANGAT)**

TARIKH : 11 OGOS 2020 (SELASA)

SOALAN

DATUK HAJI HASANUDDIN BIN MOHD YUNUS [HULU LANGAT] minta **MENTERI DALAM NEGERI** menyatakan mengapa kempen-kempen antidadah dilihat begitu lesu berbanding usaha Kerajaan pada tahun 1980an yang agresif di media-media mahupun di sekolah-sekolah.

JAWAPAN

Tuan Yang Di Pertua,

Kementerian Dalam Negeri sentiasa memandang serius isu penyalahgunaan dadah dan giat melaksanakan pelbagai program pendidikan pencegahan dadah yang merangkumi kempen-kempen antidadah melalui lima jenis media iaitu media penyiaran, media cetak, media bersemuka, media luar dan media baharu.

Strategi penyampaian mesej antidadah telah berubah mengikut arus peredaran masa dan Agensi Antidadah Kebangsaan (AADK) juga tidak ketinggalan dalam menggunakan teknologi maya. Ini juga amat bertepatan dengan trend penagihan dadah yang menunjukkan bahawa 74.1% daripada penagih dadah baru yang dikesan terdiri daripada golongan remaja dan belia yang cenderung menggunakan media sosial untuk mendapatkan maklumat.

NO. SOALAN : 14

Mesej-mesej antidadah disampaikan dengan memuatnaik infografik menarik berkaitan maklumat dadah, video-video pendek bermesejkan moral dan nasihat bagi meningkatkan kesedaran awam dan perkhidmatan terkini yang disediakan oleh AADK. Sehingga Jun 2020, akaun media sosial rasmi AADK telah mencatatkan capaian seperti berikut:

- i. akaun *Facebook* mencatatkan 28,747 muat naik dengan anggaran 8,114,438 pengunjung;
- ii. akaun *Twitter* mencatatkan 9,367 muat naik dengan anggaran 200,642 pengunjung;
- iii. laman sesawang mencatatkan 1,972 muat naik dengan anggaran 97,543 pengunjung; dan
- iv. akaun *Youtube*, mencatatkan 41 muat naik dengan anggaran 79,298 pengunjung.

Selain penggunaan media sosial, kempen-kempen antidadah turut dilaksanakan melalui media penyiaran iaitu iklan di televisyen dan slot bual bicara dalam rancangan Selamat Pagi Malaysia, Wanita Hari Ini, Borak Kopitiam dan Mingguan Wanita. Sejak tahun 2017, kira-kira 500 penyiaran iklan dan 29 program bual bicara di televisyen telah dilaksanakan. Kempen melalui radio turut dijalankan melalui saluran RTM seperti Nasional FM, Kool FM dan Traxx FM di mana kira-kira 200 iklan publisiti dan 18 program penerangan di radio nasional telah disiarkan sejak tahun 2017. Iklan antidadah turut disiarkan di 140 panggung wayang seluruh negara pada tahun 2017 serta 2018 dan terdapat 2,163 papan tanda (*billboard*) iklan antidadah di jalan raya pada tahun 2019.

Dijangkakan melalui strategi ini, seramai 8.4 juta orang akan mendapat maklumat antidadah.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS
TAHUN 2020**

PERTANYAAN : LISAN

**DARIPADA : YB DATO' HAJI MOHD FASIAH BIN HAJI MOHD
FAKEH [SABAK BERNAM]**

TARIKH : 11 OGOS 2020 (SELASA)

SOALAN

DATO' HAJI MOHD FASIAH BIN HAJI MOHD FAKEH [SABAK BERNAM] minta **MENTERI SUMBER MANUSIA** menyatakan jumlah pekerja terutamanya pekerja tempatan yang diberhentikan atau 'retrenched' oleh sektor swasta khususnya pekerja industri bagi tempoh 2018, 2019 dan terkini 2020 termasuk semasa pandemik COVID-19 dan nyatakan setakat manakah Sistem Insurans Pekerjaan (EIS) dapat membantu golongan ini untuk mendapat pekerjaan serta apakah langkah Kerajaan bagi membantu golongan pekerja rakyat negara ini yang terpaksa diberhentikan dan kehilangan pekerjaan ini untuk terus menyara kehidupan mereka dan keluarga.

JAWAPAN

Tuan Yang di-Pertua,

1. Untuk makluman Dewan Yang Mulia ini, berhubung pertanyaan yang dibangkitkan oleh **YB Sabak Bernam**, sebagaimana sedia maklum, pandemik COVID-19 telah memberi impak besar kepada ekonomi global keseluruhannya termasuk di Malaysia. Inisiatif yang telah diperkenalkan bertujuan agar dapat menstabilkan ekonomi dan mengekang pembuangan

atau pemberhentian pekerjaan secara besar-besaran oleh sektor swasta khususnya.

2. Berdasarkan **rekod Sistem Insurans Pekerjaan (SIP)** berhubung dengan kes kehilangan pekerjaan adalah seperti berikut:

- i. Bagi rekod kehilangan pekerjaan untuk tahun 2018, sebanyak 23,697 kes telah diterima oleh Pejabat Sistem Insurans Pekerjaan ;
- ii. Bagi tahun 2019, sebanyak 40,084 kes kehilangan pekerjaan telah diterima oleh Pejabat Sistem Insurans Pekerjaan; dan
- iii. Setakat 31 Julai 2020, sebanyak 67,068 kes kehilangan pekerjaan telah diterima oleh Pejabat Sistem Insurans Pekerjaan.

Tuan Yang di-Pertua,

3. Kerajaan telah memperkenalkan beberapa inisiatif di bawah Pakej PRIHATIN dan beberapa penambahbaikan di bawah PENJANA untuk membantu majikan agar dapat mengekalkan pekerja mereka dan juga mengekang dari berlakunya pemberhentian secara besar-besaran.

4. Inisiatif-Inisiatif yang diperkenalkan adalah seperti berikut:

- i. Memperkenalkan ***Employment Retention Programme (ERP)***
Bantuan segera (*immediate financial assistance*) sebanyak RM600 sebulan kepada majikan untuk dibayar bagi setiap pekerja yang diminta bercuti tanpa gaji (CTG) akibat penularan COVID-19.
- ii. Memperkenalkan **Program Subsidi Upah (PSU)**

Program ini adalah bertujuan untuk membantu majikan yang terkesan dari segi ekonomi akibat COVID-19 supaya dapat

meneruskan operasi syarikat serta mengelakkan pekerja hilang pekerjaan dan punca pendapatan. Tempoh PSU pada mulanya adalah untuk 3 bulan bermula pada 1 April 2020 dan telah dilanjutkan lagi untuk tempoh tiga (3) bulan di bawah PENJANA. Bantuan PSU adalah berdasarkan kepada tiga kategori saiz perusahaan.

- iii. Memperkenalkan **Program Insentif Pengambilan Pekerja** (*Hiring Incentive Programme*), Bantuan Mobiliti dan Program Latihan di bawah Pelan Jana Semula Ekonomi Negara (PENJANA). Program ini adalah bertujuan untuk merangsang pengambilan pekerja oleh majikan, di samping itu meningkatkan **kebolehpkerjaan** seseorang pekerja melalui latihan/latihan semula.

Program-program **di bawah PENJANA** untuk merangsang pengambilan pekerja oleh majikan adalah seperti berikut:

- Program *MyApprentice* - keutamaan diberi kepada graduan baharu atau *fresh graduate* atau pelajar lepasan sekolah;
- Program *HireMalaysia* - pengambilan pekerja tempatan di bawah umur 40 tahun dan berumur 40 tahun ke atas;
- Insentif Pengambilan Pekerja Tempatan dari golongan Orang Kelainan Upaya (OKU) dan peserta Program *Return to Work* PERKESO;
- Bantuan Mobiliti secara *one-off* kepada pekerja yang berpindah dari lokasi tempat bermastautin ke tempat kerja baharu.
- Program latihan untuk pekerja berdasarkan keperluan majikan; dan
- Portal *MYFutureJobs* iaitu portal pekerjaan membantu majikan dan pencari kerja mendapatkan pekerjaan.

5. Untuk makluman Ahli-Ahli Yang Berhormat, selain daripada inisiatif-inisiatif Kerajaan di bawah PRIHATIN dan PENJANA, Kerajaan telah memperkenalkan dan melaksanakan **Sistem Insurans Pekerjaan (SIP)** yang bertujuan untuk membantu mereka yang kehilangan pekerjaan.

6. Di bawah SIP, pekerja-pekerja yang kehilangan pekerjaan akan diberi bantuan kewangan segera untuk menampung perbelanjaan semasa dan juga bantuan pencarian pekerjaan baru. Jika syarat-syarat kelayakan dan caruman sebanyak 12 bulan dipenuhi, pekerja adalah layak untuk menuntut faedah penuh SIP seperti berikut:

- i. Elaun Mencari Pekerjaan (EMP)
- ii. Elaun Bekerja Semula Awal (EBSA)
- iii. Elaun Pendapatan Berkurangan (EPB)
- iv. Elaun Latihan
- v. Fi Latihan (Dibayar kepada Penyedia Latihan)

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SHAMSUL ISKANDAR @
YUSRE BIN MOHD AKIN [HANG TUAH JAYA]**

TARIKH : 11 OGOS 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan masalah yang dihadapi oleh penduduk Program Perumahan Rakyat Termiskin (PPRT) sepanjang tempoh pelaksanaan Perintah Kawalan Pergerakan (PKP) akibat COVID-19 dan apakah bantuan yang disalurkan oleh Kerajaan.

JAWAPAN

Tuan Yang di-Pertua,

Untuk makluman Yang Berhormat, pelaksanaan Perintah Kawalan Pergerakan (PKP) akibat COVID-19 telah memberi kesan kepada semua pihak dalam pelbagai aspek termasuklah kekangan kewangan dan punca pendapatan, bekalan makanan, pergerakan dan lain-lain. Tidak terkecuali penerima bantuan Program Perumahan Rakyat Termiskin (PPRT) juga turut terkesan.

Khususnya berkaitan dengan bantuan PPRT, pelaksanaan PKP menyebabkan hampir semua projek sama ada yang sedang berjalan atau telah diluluskan tidak dapat diteruskan berikutan sektor pembinaan tidak termasuk di dalam sektor yang dibenarkan beroperasi dalam tempoh tersebut. Keadaan ini menyebabkan penerima terpaksa menunggu lebih lama untuk menerima bantuan.

NO. SOALAN : 16

Walau bagaimanapun, dalam fasa keempat tempoh PKP, Kerajaan telah membenarkan sektor pembinaan beroperasi mengikut prosedur operasi standard yang ditetapkan. Sehubungan itu, bantuan PPRT hanya dapat diteruskan pelaksanaannya pada awal Mei 2020. Namun begitu, kerja-kerja di tapak masih lagi perlahan berikutan kontraktor yang dilantik perlu mematuhi syarat-syarat ketat yang ditetapkan. Pada masa ini, kesemua projek PPRT sedang berjalan dengan giat setelah Kerajaan membenarkan semua sektor beroperasi.

Selain daripada bantuan PPRT, program-program lain di bawah Kementerian untuk golongan miskin dan miskin tegar juga tertangguh untuk dilaksanakan. Antaranya adalah Program Peningkatan Pendapatan (PPP) iaitu pemberian bantuan peralatan dan latihan untuk meningkatkan pendapatan penerima dan Program Latihan Kemahiran dan Kerjaya (PLKK) yang menyediakan peluang latihan untuk kerjaya terpaksa ditangguhkan pelaksanaannya. Kesemua ini menyebabkan penerima tidak dapat mengikuti program seperti dirancang.

Program-program bantuan yang disediakan oleh Kementerian dalam tempoh PKP adalah terhad kepada skop bantuan melalui program-program sedia ada sahaja. Namun begitu, Kementerian sentiasa bekerjasama antara agensi Kerajaan, badan bukan Kerajaan (NGO) dan pihak-pihak swasta untuk menyalurkan bantuan sebaiknya kepada golongan sasaran.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE TIGA,
PARLIMEN EMPATBELAS**

PERTANYAAN : JAWAB LISAN

DARIPADA : YB DATUK MOHAMAD BIN ALAMIN [KIMANIS]

TARIKH : 11 OGOS 2020 (SELASA)

SOALAN

DATUK MOHAMAD BIN ALAMIN [KIMANIS] minta **MENTERI DALAM NEGERI** menyatakan apakah langkah-langkah Kerajaan yang sedang dan akan diambil bagi meningkatkan tahap keselamatan di Kawasan Keselamatan Khas Pantai Timur Sabah (ESSCOM).

JAWAPAN

Tuan Yang Di Pertua,

Pihak ESSCOM telah melaksanakan beberapa tindakan dalam meningkatkan tahap keselamatan di kawasan Pantai Timur Sabah bagi mengekang jenayah rentas sempadan. Langkah-langkah yang telah dan sedang diambil antaranya adalah seperti berikut;

- a) memperkukuhkan dan menambah aset- aset laut seperti kapal dan bot-bot daripada agensi Keselamatan PDRM, TLDM dan APMM di kawasan perairan Esszone dalam meningkatkan kawalan di kawasan-kawasan 'hotspot'. ESSCOM juga meneruskan aturgerak aset-aset bagi mengekang kemasukan elemen 'lawless' ini daripada masuk melakukan jenayah dalam perairan negara;
- b) pihak Keselamatan ESSCOM turut menjalinkan kerjasama rapat dengan agensi Keselamatan Filipina dan Indonesia dalam menangani elemen *kidnap for ransom* dan jenayah rentas sempadan yang lain seperti pendatang tanpa izin, penyeludupan dan lain-lain;
- c) cadangan untuk mewujudkan dan melaksanakan 'Sea Check Point' (SCP) mengikut 'Designated Route' di daerah Kudat, Sandakan, Lahad Datu dan Tawau bagi memeriksa kapal atau *vessel* yang masuk ke perairan negara khususnya Sabah untuk aktiviti-aktiviti *barter trade*, *transshipment* dan *normal*. Ini bagi membendung aktiviti penyeludupan barang kawalan dan jenayah yang lain; dan
- d) menambahbaik serta mewujudkan 'Road Check Point' (RCP) di kawasan strategik dan laluan utama seperti RCP Sapi Nangoh dan RCP Kalabakan dalam membendung aktiviti penyeludupan pendatang tanpa izin, barang kawalan dan sebagainya.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN
DARIPADA : YB TUAN BARU BIAN
KAWASAN : SELANGAU
TARIKH : 11 OGOS 2020 (SELASA)

SOALAN NO. 18

minta **MENTERI KERJA RAYA** menyatakan adakah Kerajaan akan meneruskan projek pembinaan *Sarawak Sabah Link Road (SSLR)* dan apakah status terkini projek tersebut.

JAWAPAN

Tuan Yang Di-Pertua,

Untuk makluman Ahli Yang Berhormat, Kerajaan akan tetap meneruskan Projek *Sarawak - Sabah Link Road* (SSLR) yang dilaksanakan secara berfasa iaitu Fasa 1 dari Lawas ke Kampung Pa' Berunut dan Fasa 2 dari Kampung Pa' Berunut ke Long Lama. Setakat kini, surat niat (LOI) telah dikeluarkan kepada kontraktor pada 7 Julai 2020 manakala SST akan dikeluarkan apabila kontraktor memenuhi syarat-syarat yang ditetapkan dalam dokumen tender.

Sekian, terima kasih.

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL KETIGA
PARLIMEN KEEMPAT BELAS (2020)**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 11 OGOS 2020 (SELASA)

SOALAN

TUAN CHE ALIAS BIN HAMID [KEMAMAN] minta **MENTERI ALAM SEKITAR DAN AIR** menyatakan tindakan yang diambil secara tidak langsung impak negatif COVID-19 terhadap alam sekitar terutama peningkatan penggunaan plastik domestik.

JAWAPAN

Tuan Yang Di-Pertua,

1. Kementerian Alam Sekitar dan Air amat sedar ketika berlakunya Pandemik Covid 19 di Negara ini, terdapat sedikit sebanyak impak kepada peningkatan penggunaan plastik sekali guna di dua sektor iaitu;

- (i) penggunaan plastik sekali guna di sektor penghantaran makanan ke rumah-rumah oleh perkhidmatan makanan dalam talian seperti Food Grab atau Food Panda, penggunaan plastik di pasar-pasar basar dan pasaraya-pasaraya; serta
- (ii) penggunaan plastik di sektor perubatan seperti pakaian pakai buang pelindung diri (*personal protective equipment - PPE*).

Untuk makluman Ahli-Ahli Yang Berhormat,

2. Barang-barang buangan seperti plastik domestik sekali guna oleh ;
 - (i). Sektor penghantaran makanan dalam talian ;
 - (ii). Plastik digunakan di premis pasar basah dan pasaraya ;
 - (iii). Pejabat, Kilang dan seumpamanya ;
3. Yang digunakan bagi tujuan pembungkusan dan perlindungan diri daripada jangkitan Pandemik COVID-19, adalah di kategorikan sebagai buangan domestik.
4. Buangan ini dilupuskan sebagai buangan domestik (sisa pepejal) yang di uruskan oleh Pihak Berkuasa Tempatan di bawah bidang-kuasa Kementerian Perumahan dan Kerajaan Tempatan.
5. Manakala untuk Pelupusan Sisa Klinikal pula, Kerajaan melalui Kementerian Kesihatan Malaysia, telah melantik beberapa Syarikat dan Kontraktor untuk menguruskan kutipan, pengangkutan, rawatan dan pelupusan akhir sisa buangan klinikal tersebut.
6. Kesemua Syarikat dan Kontraktor ini telah dikenal-pasti mempunyai kemudahan seperti ;
 - (i) Teknologi *incinerator* (pelupusan akhir);
 - (ii) Microwave dan Ozonator (teknologi pra-rawatan); dan
 - (iii) Kemudahan tapak pelupusan yang selamat (pelupusan akhir) bagi merawat sisa buangan klinikal tersebut.
7. Syarikat dan Kontraktor ini di lesenkan di bawah Seksyen 18, Akta Kualiti Alam Sekeliling 1974.
8. Oleh yang demikian, Kementerian amat sedar ada peningkatan penggunaan plastik domestik ketika berlakunya Pandemik COVID 19 ini.
9. Tindakan yang di ambil oleh Kementerian Alam Sekitar dan Air mengenai isu peningkatan penggunaan plastik ini adalah ;

- (i). KASA akan meneruskan kerjasama dengan Kementerian Perumahan dan Kerajaan Tempatan dalam menangani Isu Pengurusan Sisa Plastik secara umum ;
- (ii). KASA akan terus mengadakan perbincangan dengan pemain-pemain Industri Sektor Perniagaan dan Peruncitan, untuk mencari kaedah serta inisiatif terbaik bagi mengurangkan penggunaan plastik sekali guna domestik ;
- (iii). KASA juga sedang membangunkan Pelan Hala Tuju Ekonomi Kitaran Plastik, sebagai panduan kepada pemain-pemain Industri, untuk mentransformasikan perniagaan mereka kepada Ekonomi Kitaran yang boleh memaksimumkan tempuh penggunaan barang-barang plastik ; dan
- (iv). Pada waktu yang sama, KASA akan meningkatkan kefahaman dan kesedaran Orang Awam dalam pengurusan buangan plastik domestik di dalam Media Sosial dan Program Kesedaran Kementerian.

10. Kelestarian Alam Sekitar adalah merupakan tanggung-jawab bersama Rakyat Malaysia. Agar kita dapat memastikan Bumi ini terus terpelihara dan segar untuk Generasi masa hadapan.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 11 OGOS 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan perincian lokasi termasuk kos pembekalan 14 Projek Perumahan Rakyat (**PPR**) baharu yang akan dilaksanakan mulai tahun 2020. Apakah perkembangan proses penjenamaan semula dan model kewangan yang bakal dipraktikkan.

JAWAPAN

Tuan Yang di-Pertua,

1. Untuk makluman Yang Berhormat, di bawah Rolling Plan Ke-4 (RP4) Tahun 2020, Rancangan Malaysia Ke-11 (RMKe-11) tiada projek baharu bagi Program Perumahan Rakyat (PPR) yang diluluskan untuk dilaksanakan pada tahun ini. Walau bagaimanapun, terdapat 11 projek PPR sedia ada baharu dengan anggaran kos berjumlah RM890 juta telah diluluskan untuk diteruskan pelaksanaannya di beberapa negeri iaitu di Johor, Negeri Sembilan, Perlis, Terengganu, Pahang, Kelantan dan Sabah.

2. Jemaah Menteri pada 20 Mei 2020 juga bersetuju supaya pelaksanaan 11 projek PPR sedia ada baharu ini mengikut ciri-ciri asas Dasar Perumahan Mampu Milik Negara (DRMM). Daripada jumlah tersebut, sebanyak 5 projek PPR akan mula dilaksanakan pada tahun 2020.

3. Penjenamaan semula PPR kepada Rumah Malaysia (Sewa) akan bermula bagi projek-projek di bawah RMKe-12 dan model kewangan bagi projek Rumah Malaysia (Sewa) akan dibiayai melalui peruntukan pembangunan tertakluk kepada kelulusan Agensi Pusat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN
DARIPADA : YB TUAN LOKE SIEW FOOK
KAWASAN : SEREMBAN
TARIKH : 11 OGOS 2020 (SELASA)

SOALAN NO. 21

minta **MENTERI KERJA RAYA** menyatakan projek yang telah dilaksanakan serta perbelanjaan yang diperuntukkan di bawah RMK-11 (2016 - 2020) untuk tujuan meningkatkan keselamatan jalan raya dan untuk RMK-12 yang akan datang sejauh manakah Kerajaan bersedia untuk membina laluan khas motosikal untuk lokasi yang terpilih serta membina pembahagi median jalan (road median divider) demi mengurangkan risiko kemalangan jalan raya khususnya untuk kumpulan penunggang motosikal.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya (KKR) amat mengambil berat isu keselamatan jalan raya khususnya di jalan – jalan Persekutuan seluruh negara. Bagi maksud tersebut dan sebagai langkah jangka pendek, KKR melalui Jabatan Kerja Raya (JKR) melaksanakan inisiatif di bawah Program Merawat Dan Memperelok Lokasi Kerap Berlaku Kemalangan. Program ini akan mengenal pasti dan memperbaiki lokasi kemalangan di jalan-jalan Persekutuan tersebut yang dikenali sebagai kawasan *blackspots* untuk mengurangkan kemalangan yang disebabkan oleh faktor kejuruteraan jalan.

Bagi rekod pembaikan yang telah dilaksanakan di jalan – jalan Persekutuan seluruh negara dalam Rancangan Malaysia ke-11, sebanyak **113** lokasi telah dilaksanakan pembaikan pada tahun 2017 hingga 2019. Manakala pada tahun 2020 pula, sebanyak 50 lokasi disasarkan untuk untuk dibaikpuih yang menjadikan keseluruhan lokasi sebanyak **163 lokasi**. Pembaikan ini bersifat *low cost, high impact solutions* (dengan izin). Secara keseluruhannya, kos rawatan yang terlibat bagi kerja – kerja memperelok kesemua lokasi *blackspots* ini dianggarkan berjumlah **RM47 juta**. Pemantauan keberkesanan akan terus dilaksanakan pada setiap masa oleh KKR dan JKR di kawasan *blackspots* yang telah dibuat rawatan disamping mengenalpasti lokasi - lokasi baru *blackspots* di seluruh negara

Tuan Yang Di-Pertua,

Berkaitan dengan laluan khas motorsikal, KKR mempunyai dasar untuk menyediakan bahu jalan berturap dengan kelebaran minimum 2 meter untuk digunakan oleh penunggang motorsikal di jalan - jalan baru Persekutuan yang berpiawaian R5 dan ke atas, termasuklah membinanya di jalan Persekutuan sedia ada yang dikenalpasti oleh pihak KKR. Dengan

adanya bahu jalan berturap ini, maka penunggang motorsikal dapat menggunakan jalan tersebut dengan lebih selamat dan selesa sekaligus dapat mengurangkan kadar kemalangan yang membabitkan penunggang motorsikal. Walau bagaimanapun, pembinaan bahu jalan berturap ini adalah tertakluk kepada kelulusan ke atas skop kerja dan juga peruntukan dari pihak agensi pusat.

Untuk makluman Ahli Yang Berhormat, berkenaan pembinaan median jalan, Kementerian ini telah menerima permohonan projek menaiktaraf jalan yang melibatkan skop membina median jalan untuk dilaksanakan dalam RMKe-12. Permohonan ini telah pun diangkat untuk pertimbangan dan tertakluk kepada kelulusan agensi pusat.

Sekian, terima kasih.

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL KETIGA
PARLIMEN KEEMPAT BELAS (2020)**

PERTANYAAN : LISAN

DARIPADA : PUAN YEO BEE YIN (BAKRI)

TARIKH : 11 OGOS 2020 (SELASA)

SOALAN

PUAN YEO BEE YIN [BAKRI] minta **MENTERI ALAM SEKITAR DAN AIR** menyatakan sama ada suspek-suspek pencemaran Sg. Kim Kim telah didakwa di mahkamah dan apakah status pendakwaan terkini serta status kalibrasi realtime alert system untuk memberi amaran pencemaran awal di Pasir Gudang.

JAWAPAN

Tuan Yang Di-Pertua,

1. Pihak yang disyaki yang menyebabkan pencemaran Sungai Kim Kim telah dituduh di bawah Seksyen 34B, Akta Kualiti Alam Sekeliling 1974, Peraturan-Peraturan Kualiti Alam Sekeliling (Udara Bersih) 2014 dan Peraturan-Peraturan Kualiti Alam Sekeliling (Buangan Terjadual) 2005.
2. Sebutan kes pertama telah bermula pada 24 Mac 2019. Manakala perbicaraan telah dijalankan pada 3 Disember 2019 dan kes akan disambung perbicaraannya pada 1 September 2020.
3. Bagi status kalibrasi *realtime alert system* (RAS), di Pasir Gudang, Johor telah siap dikalibrasi pada bulan Februari 2020 dengan had bacaan bagi Jumlah Sebatian Organik Meruap (*Total Volatile Organic Compound* - TVOC)

pada 1 ppm (*parts per million*). Manakala penyelenggaraan stesen dijalankan setiap 3 bulan sekali.

4. Dalam sistem RAS, had yang ditetapkan (*threshold*) adalah 1 ppm dan sekiranya bacaan TVOC melebihi had berkenaan, ia akan secara automatik mengaktifkan sistem amaran. Jabatan Alam Sekitar (JAS) dan agensi yang berkaitan akan terus mengambil tindakan segera menangani krisis seumpama ini.

Ahli-ahli Yang Berhormat,

5. Ini amat penting kerana dengan adanya sistem seumpama ini, tindakan segera dan pantas akan diambil oleh Kementerian Alam Sekitar dan Air melalui JAS. Disamping itu agensi-agensi lain yang berkaitan juga akan bertindak untuk bersama-sama memastikan impak yang minima terhadap keselamatan dan kesihatan penduduk-penduduk di sekitar kawasan berkenaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE TIGA,
PARLIMEN EMPATBELAS**

PERTANYAAN : JAWAB LISAN

**DARIPADA : YB DATO' SRI DR. SHAHIDAN BIN KASSIM
(ARAU)**

TARIKH : 11 OGOS 2020 (SELASA)

SOALAN

DATO' SERI DR. SHAHIDAN BIN KASSIM [ARAU] minta **MENTERI DALAM NEGERI** menyatakan adakah pihak Kerajaan bercadang untuk membuka semula Zon Aliran Bebas (Free Flow) sejauh 2 kilometer di sempadan Malaysia - Thailand di Wang Kelian selepas PKPP (COVID-19) bagi merancakkan semula perkembangan perdagangan di kawasan tersebut.

JAWAPAN

Tuan Yang Di-pertua,

Untuk makluman Ahli Yang Berhormat, Perintah Imigresen dan Pasport (Pengecualian) (Wang Kelian *Free Flow Zone*) 2009: PU(A) 243/2009 merupakan satu perintah yang mengecualikan warganegara Thailand dari keperluan mendapatkan pas lawatan dan mengemukakan pasport ke kawasan pintu masuk Wang Kelian di Malaysia serta mengecualikan warganegara Malaysia daripada keperluan mengemukakan pasport ke kawasan Wang Prachan di Thailand. Perintah Pengecualian ini mula berkuatkuasa sejak 19 Jun 2009 dan kemudahan *free flow* antara Wang Kelian dan Wang Prachan diberikan bermula dari jam 8 pagi sehingga jam 7 malam sahaja.

Walau bagaimanapun, Kerajaan telah menghentikan kemudahan *free flow* tersebut di Kompleks Imigresen, Kastam, Kuarantin dan Keselamatan (*Immigration, Customs, Quarantine and Security* – ICQS) Wang Kelian bermula 1 April 2015 bertujuan untuk menguatkuasakan akta dan peraturan berkaitan kawalan keluar dan masuk Malaysia. Sejak daripada itu, warganegara Malaysia yang ingin menyeberangi sempadan perlu melalui pintu masuk yang diwartakan dan perlu mempunyai pasport antarabangsa serta dokumen perjalanan yang sah seperti pas sempadan dan sebaliknya. Peraturan tersebut dilaksanakan sebagai langkah kawalan pergerakan keluar masuk dan kawalan sempadan bagi menyekat dan mengekang ancaman serta penyeludupan barangan terlarang yang dilihat menjadi ancaman kepada negara.

Sebarang cadangan untuk membuka semula kemudahan *free flow* Wang Kelian perlu dikaji dan diteliti dengan berhati-hati tertakluk kepada peruntukan undang-undang sedia ada serta keutamaan kepada aspek keselamatan negara.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN JUGAH ANAK MUYANG @
TAMBAT [LUBOK ANTU]**

TARIKH : 11.8.2020 (SELASA)

SOALAN

minta **MENTERI PEMBANGUNAN LUAR BANDAR** menyatakan apakah program dan perancangan khusus Kementerian untuk membantu penjaan pendapatan dan membantu golongan miskin dan miskin tegar memandangkan Lubok Antu adalah satu daripada 10 daerah termiskin di Malaysia.

JAWAPAN

Tuan Yang di-Pertua,

Untuk makluman Yang Berhormat, berdasarkan Laporan Penyiasatan Pendapatan Isi Rumah dan Kemudahan Asas 2016 yang disediakan oleh Jabatan Perangkaan Malaysia, insiden kemiskinan di luar bandar Sarawak adalah 1.1% pada tahun 2016. Selain itu, purata pendapatan penduduk luar bandar di Sarawak bagi tahun 2016 adalah pada RM3,695.

Salah satu matlamat Dasar Pembangunan Luar Bandar 2030 (DPLB 2030) yang dilancarkan pada 27 Jun 2019 yang lalu adalah untuk meningkatkan kesejahteraan penduduk luar bandar dari segi ekonomi, sosial, budaya dan persekitaran. Sehubungan dengan itu, bagi meningkatkan pendapatan penduduk luar bandar, Kementerian telah melaksanakan pelbagai program khusus untuk membantu penduduk luar bandar di dalam kategori miskin dan miskin tegar seperti

Program Perumahan Rakyat Termiskin (PPRT), Program Latihan Kemahiran dan Kerjaya (PLKK), Program Peningkatan Pendapatan (PPP) serta program-program keusahawanan termasuk di bawah agensi KPLB seperti KEMAS, MARA dan Lembaga Kemajuan Wilayah bagi membantu meningkatkan pendapatan isi rumah penduduk di luar bandar.

Bagi tahun 2020, KPLB telah menyalurkan peruntukan kepada SALCRA untuk melaksanakan Projek Tanam Semula Sawit Fasa 3 di Batu Kaya.

Kementerian sedang meneliti cadangan program-program baharu untuk dilaksanakan di bawah Rancangan Malaysia Kedua Belas (RMKe-12) khusus untuk meningkatkan pendapatan penduduk luar bandar, seperti mana yang telah digariskan di bawah DPLB 2030. Penumpuan pembangunan akan turut diberikan kepada kampung-kampung di 28 daerah termiskin termasuk Parlimen Lubok Antu dengan memberi fokus kepada program-program pembangunan ekonomi yang boleh meningkatkan pendapatan dan taraf hidup penduduk di kawasan sekitar.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGAL KE TIGA,
PARLIMEN EMPATBELAS**

PERTANYAAN : JAWAB LISAN

**DARIPADA : YB TUAN IGNATIUS DORELL LEIKING
(PENAMPANG)**

TARIKH : 11 OGOS 2020 (SELASA)

SOALAN

DATUK IGNATIUS DORELL LEIKING [PENAMPANG] minta **MENTERI DALAM NEGERI** menyatakan apa langkah-langkah yang akan diambil untuk menutup "Menumbok Loophole" bagi mencegah warga bukan Sabah daripada masuk ke negeri Sabah tanpa pemeriksaan/pemantauan pihak Jabatan Imigresen di bawah Kerajaan Persekutuan dan sama ada akan diwujudkan Kaunter Imigresen di Menumbok dan Entry Visa akan diperkenalkan untuk warga bukan Sabah yang memasuki Sabah melalui Labuan.

JAWAPAN

Tuan Yang Di Pertua,

Kementerian Dalam Negeri (KDN) melalui Jabatan Imigresen Malaysia melaksanakan pemeriksaan dokumen perjalanan/pasport/kad pengenalan secara menyeluruh bagi tujuan pemantauan tetapi tiada sebarang penurunan endosmen dilakukan di semua pintu masuk WP Labuan-Sabah. Ini bertujuan untuk mengawal kemasukan ke negeri Sabah secara tidak teratur melalui WP Labuan.

KDN akan mengkaji cadangan penambahbaikan kawalan di pintu masuk negeri Sabah melalui WP Labuan termasuk pembatalan dasar *free flow* WP Labuan-Sabah dengan mengambil kira beberapa isu yang timbul khususnya berkaitan Pendatang Asing Tanpa Izin (PATI) di Sabah.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE TIGA,
PARLIMEN EMPATBELAS**

PERTANYAAN : JAWAB LISAN

DARIPADA : YB TUAN DR HATTA B. MD RAMLI (LUMUT)

TARIKH : 11 OGOS 2020 (SELASA)

SOALAN

DATUK WIRA DR. MOHD HATTA BIN MD. RAMLI [LUMUT] minta **MENTERI DALAM NEGERI** menyatakan mengenai kedudukan siasatan berhubung kematian anggota bomba, Muhammad Adib Mohd Kassim pada tahun 2018.

JAWAPAN

Tuan Yang Di Pertua,

Untuk makluman Ahli-ahli Yang Berhormat, Mahkamah Koroner Shah Alam yang bersidang pada 27 September 2019, telah memutuskan punca kematian anggota bomba, Muhammad Adib bin Mohd Kassim, bukanlah disebabkan kemalangan tetapi disebabkan perbuatan jenayah oleh dua (2) orang atau lebih suspek. Berdasarkan keputusan tersebut, PDRM sedang menjalankan siasatan berdasarkan arahan Pejabat Peguam Negara dan mengumpul bukti-bukti yang ada untuk dikemukakan semula kepada pihak pendakwa.

Kertas siasatan telah dirujuk semula ke Jabatan Peguam Negara pada 23 Julai 2020 dengan cadangan-cadangan seperti berikut:

- i. Menuduh 12 orang suspek di bawah Seksyen 143 Kanun Keseksaan yang merusuh dan menyerang jentera bomba; dan
- ii. Mengadakan inkues semula untuk siasatan lanjut jika dipersetujui oleh Peguam Negara di bawah peruntukan Seksyen 339(2) Kanun Prosedur Jenayah.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS
TAHUN 2020**

PERTANYAAN : LISAN

DARIPADA : YB TUAN SABRI BIN AZIT [JERAJ]

TARIKH : 11 OGOS 2020 (SELASA)

SOALAN

TUAN SABRI BIN AZIT [JERAJ] minta **MENTERI SUMBER MANUSIA** menyatakan adakah Kerajaan berhasrat membina sebuah Pusat Rehabilitasi PERKESO di negeri Kedah untuk kemudahan pekerja di kawasan utara Semenanjung mendapatkan rawatan pemulihan supaya dapat kembali ke alam pekerjaan.

JAWAPAN

Tuan Yang di-Pertua,

1. Untuk makluman Dewan Yang Mulia ini, pada masa ini, terdapat satu pusat rehabilitasi PERKESO yang lengkap dengan kemudahan teknologi rehabilitasi terkini, kemudahan wad, asrama, gimnasium, vokasional, *work hardening* dan terapi hidro dengan kapasiti anggota terlatih dan profesional terletak di Melaka bagi orang berinsurans (pekerja). Pusat ini boleh menampung maksimum 50 katil di hospital dan 300 katil di asrama pada satu-satu masa.
2. Bagi pembinaan sebuah pusat rehabilitasi baharu, ianya **memerlukan kos yang besar**. Justeru, cadangan untuk membuka pusat rehabilitasi baharu memerlukan kajian terperinci dan perlu mengambil kira pelbagai faktor serta perspektif secara menyeluruh **dari segi kemampanan dana PERKESO, kepentingan dan impak sosioekonomi selain faktor geografi, keperluan dan keutamaan (*urgency*)**.
3. Pada masa ini, Kerajaan tiada cadangan membuka pusat rehabilitasi di negeri Kedah. Walau bagaimanapun, bagi menampung keperluan pekerja-pekerja di kawasan utara Semenanjung, mereka boleh mendapatkan rawatan pemulihan di panel-panel rehabilitasi yang telah dilantik oleh PERKESO.
4. Kerajaan terbuka untuk mempertimbangkan sebarang cadangan bagi membuka pusat rehabilitasi di mana-mana lokasi yang bersesuaian setelah mengambil kira pelbagai faktor seperti yang dinyatakan di atas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS
TAHUN 2020**

PERTANYAAN : LISAN

**DARIPADA : YB DR. NIK MUHAMMAD ZAWAWI BIN HAJI
SALLEH [PASIR PUTEH]**

TARIKH : 11 OGOS 2020 (SELASA)

SOALAN

DR. NIK MUHAMMAD ZAWAWI BIN HAJI SALLEH [PASIR PUTEH] minta **MENTERI SUMBER MANUSIA** menyatakan apakah pihak Kementerian mempunyai perancangan untuk mewujudkan satu program elaun bulanan yang memberikan manfaat kepada pencari kerja baharu khususnya dalam kalangan belia sebagaimana dilaksanakan di Australia.

JAWAPAN

Tuan Yang di-Pertua,

1. Pada masa kini, Kementerian Sumber Manusia belum ada cadangan untuk memberi elaun bulanan yang memberi manfaat kepada pencari kerja baharu khususnya dalam kalangan belia sebagaimana dilaksanakan di Australia kerana ia akan membebankan Kerajaan dari segi kewangan yang sangat besar.
2. Namun begitu, Kerajaan bersedia mengkaji semula dengan teliti cadangan YB Pasir Puteh ini berdasarkan keadaan ekonomi semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 11 OGOS 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan selepas pengumuman pada tahun lepas perancangan untuk menaik taraf beberapa pusat pelupusan sampah kepada Waste-To-Energy (WTE), berapakah tapak pelupusan yang sedang dalam proses menaik taraf kepada WTE.

JAWAPAN

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) mensasarkan untuk menaiktaraf tapak pelupusan sedia ada kepada tapak pelupusan sanitari bersepadu, yang mana tapak-tapak pelupusan sanitari bersepadu ini bukan hanya dilengkapi dengan sistem kawalan pencemaran seperti loji rawatan air larut resap (*leachate treatment plant*) tetapi akan turut dilengkapi dengan sistem rawatan sisa pepejal berkonsepkan *Waste To Energy* (WtE). Pembinaan fasiliti rawatan WtE dicadang dibina di tapak-tapak pelupusan sedia ada.
2. Pembinaan fasiliti rawatan WtE ini adalah bertujuan untuk memastikan semua sisa pepejal yang dijana, dirawat terlebih dahulu sebelum dilupuskan ke tapak pelupusan. Seterusnya ia dapat mengurangkan jumlah sisa pepejal yang dilupuskan ke tapak pelupusan serta memanjangkan jangka hayat tapak pelupusan sedia ada.
3. Pada masa kini, 1 projek WtE di Ladang Tanah Merah, Port Dickson, Negeri Sembilan sedang dalam peringkat pembinaan dan 1 lagi projek WtE Kuala Lumpur telah pun selesai proses tender. Pengoperasian WtE Ladang Tanah Merah dijangka akan bermula pada April 2021 dan pembinaan WtE Kuala Lumpur akan dilaksanakan setelah lokasi bagi projek ini dimuktamadkan. Pada masa akan datang, KPKT merancang untuk membina 5 lagi projek WtE di Johor, Melaka, Kedah dan Pahang.
4. Walaupun KPKT merancang untuk membina fasiliti rawatan WtE, tapak pelupusan masih perlu dikekalkan bagi menerima sisa akhir (*residue*) seperti abu dari rawatan sisa pepejal. Kedua-dua fasiliti ini adalah saling melengkapi bagi memastikan pengurusan sisa pepejal yang mampan dan komprehensif. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KETIGA,
PARLIMEN EMPATBELAS**

PERTANYAAN : JAWAB LISAN

**DARIPADA : YB TUAN KARUPAIYA A/L MUTUSAMI
(PADANG SERAI)**

TARIKH : 11 OGOS 2020 (SELASA)

SOALAN

TUAN KARUPAIYA A/L MUTUSAMI [PADANG SERAI] minta **MENTERI DALAM NEGERI** menyatakan permohonan kewarganegaraan dan sijil kelahiran mengikut kaum yang diterima bagi tahun 2019 dan berapa permohonan yang telah diluluskan sehingga kini.

JAWAPAN

Tuan Yang Di-Pertua,

Berdasarkan rekod Jabatan Pendaftaran Negara (JPN) bagi tahun 2019, sebanyak 11,163 permohonan kewarganegaraan di bawah semua Perkara Perlembagaan Persekutuan telah diterima. Daripada jumlah permohonan berkenaan, sebanyak 3,509 permohonan telah siap diproses dan dikeluarkan dengan Sijil Warganegara.

Berdasarkan rekod JPN bagi tahun 2019, sebanyak 498,468 kelahiran di Malaysia telah didaftarkan dan direkodkan. Perincian jumlah kelahiran mengikut kaum pada tahun 2019 adalah seperti mana berikut:-

- a. Melayu : 322,990 orang;
- b. Cina : 57,928 orang;
- c. India : 21,554 orang;
- d. Etnik Sabah : 43,159 orang;
- e. Etnik Sarawak : 21,364 orang;
- f. Orang Asli Semenanjung : 5,144 orang; dan
- g. Lain-lain Kaum : 26,329 orang.

Untuk makluman Ahli Yang Berhormat, kelahiran yang berlaku di Malaysia tidak menyebabkan seseorang individu memperoleh kewarganegaraan Malaysia secara automatik. Kewarganegaraan seseorang individu ditentukan berdasarkan kepada status perkahwinan dan taraf kewarganegaraan ibu bapa kandung sewaktu kelahiran berlaku selaras dengan peruntukan di bawah Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN
YAAKUB [MACHANG]**

TARIKH : 11 OGOS 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan :

- (a) bilakah projek Jambatan Kg. Joh Belimbing, Machang ke Tanah Merah yang merentasi Sungai Kelantan akan dilaksanakan ; dan
- (b) bilakah jalan daripada Kampung Sat ke Kampung Maka akan dilaksanakan.

JAWAPAN

Tuan Yang di-Pertua,

Untuk makluman Yang Berhormat, Projek Jalan Dari Kg. Joh Ke Kg. Kuala Sat, Machang, Kelantan sedang dalam peringkat rekabentuk awalan di mana kerja ukur telah siap dijalankan. Buat masa ini, pihak Agensi Pelaksana bagi projek ni, iaitu Jabatan Kerja Raya Malaysia sedang dalam proses rekabentuk jajaran jalan. Projek ini dijangka dapat diiklankan pada bulan Disember 2020 bergantung kepada kelulusan permohonan pengambilan balik lot-lot tanah yang terlibat.

Bagi projek jalan dari Kampung Sat ke Kampung Maka pula, perkara ini perlu dikemukakan kepada Unit Perancang Ekonomi Negeri Kelantan untuk dimasukkan ke dalam senarai keutamaan negeri. Pihak KPLB akan membuat permohonan berdasarkan senarai keutamaan berkenaan untuk kelulusan pihak Unit Perancang Ekonomi (EPU) di dalam '*Rolling Plan*' Rancangan Malaysia ke-12 yang akan datang.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE TIGA,
PARLIMEN EMPATBELAS**

PERTANYAAN : JAWAB LISAN

DARIPADA : YB TUAN CHAN FOONG HIN (KOTA KINABALU)

TARIKH : 11 OGOS 2020 (SELASA)

SOALAN

TUAN CHAN FOONG HIN [KOTA KINABALU] minta **MENTERI DALAM NEGERI** menyatakan sama ada Kerajaan mempunyai rancangan untuk menggunakan dokumen IMM13 sebagai satu-satunya dokumen untuk penyelerasan dokumen-dokumen pendatang asing tanpa izin di Sabah dan membatalkan semua dokumen yang lain. Apakah perbezaannya dengan Pas Sementara Sabah (PSS) yang dicadangkan sebelum ini.

JAWAPAN

Tuan Yang Di Pertua,

Pas Sementara Sabah (PSS) merupakan suatu jenis pas baharu yang memerlukan pindaan terhadap perundangan sedia ada. Manakala, IMM13 adalah merupakan satu pas lawatan imigresen sedia ada yang diberikan kepada orang asing berdasarkan takrifan Peraturan 11, Peraturan-Peraturan Imigresen 1963.

Cadangan baharu agar IMM13 digunakan untuk menggantikan Kad Burung-Burung dan Sijil Banci yang dipegang oleh pendatang dan orang asing di Sabah sedang diperhalusi secara strategik dan akan diteliti oleh JKPWAS bagi memastikan usaha untuk mendokumentasikan golongan berkenaan dapat dilaksanakan dengan berkesan.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 11 OGOS 2020 (SELASA)

SOALAN

Minta **MENTERI BELIA DAN SUKAN** menyatakan perancangan Kementerian untuk menaik taraf mini Stadium Pasir Mas sebagai satu lokasi alternatif untuk persediaan penganjuran SUKMA 2024 bertempat di negeri Kelantan.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Belia dan Sukan masih belum memuktamadkan lagi penganjuran Sukan Malaysia (SUKMA) bagi tahun 2022 dan 2024. Namun begitu, Jawatankuasa Tertinggi Sukan Malaysia yang telah bersidang pada 20 Februari 2020 lalu secara sebulat suara bersetuju untuk memberi laluan kepada Negeri Kelantan menganjurkan temasya SUKMA pada tahun 2024. Penghormatan ini diberikan memandangkan Negeri Kelantan masih belum pernah menjadi tuan rumah SUKMA sejak pertama kali penganjurannya pada tahun 1986 dan dibuka kepada negeri-negeri untuk dianjurkan bermula tahun 1990.

2. Kerajaan negeri Kelantan telah mengenal pasti sebuah kawasan seluas 260 ekar untuk dibangunkan sebagai Kelantan Sports City yang juga berkait rapat dengan persediaan Kelantan sebagai penganjur Sukan

Malaysia 2024 nanti. Memandangkan Negeri Kelantan mempunyai tempoh yang panjang iaitu tempoh empat (4) hingga lima tahun (5) lagi bagi persediaan penganjuran SUKMA 2024, Kementerian sedang mengadakan perbincangan lanjut bersama Unit Perancang Ekonomi, Jabatan Perdana Menteri serta Kerajaan Negeri Kelantan dalam merangka pelan perancangan infrastruktur kemudahan sukan berdasarkan kepada jenis-jenis sukan yang akan ditawarkan untuk penganjuran oleh Negeri Kelantan nanti.

3. Pihak Kementerian juga telah menerima permohonan daripada Yang Berhormat Pasir Mas berkaitan cadangan menaik taraf Mini Stadium Pasir Mas melalui surat bertarikh 3 Jun 2020 dan secara dasarnya sedang meneliti permohonan tersebut bagi diselaraskan dengan perancangan yang sedang dilakukan dengan Kerajaan Negeri. Lawatan kerja akan turut diadakan untuk melihat dengan lebih dekat keadaan stadium dan skop naik tarafnya yang perlu dilakukan. Kos naik taraf tersebut akan dimajukan kepada Unit Perancang Ekonomi, Jabatan Perdana Menteri untuk kelulusan dan tindakan selanjutnya.

4. Manakala, permohonan menjadikan Mini Stadium Pasir Mas sebagai alternatif untuk venue SUKMA 2024 akan diusulkan kepada Kerajaan Negeri. Kementerian melalui MSN akan membantu dalam memberikan khidmat nasihat yang melibatkan spesifikasi stadium tersebut mengikut piawaian dan kesesuaian yang ditetapkan oleh Persatuan Sukan Kebangsaan sebagai venue pertandingan SUKMA 2024 nanti.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 11 OGOS 2020 (SELASA)

SOALAN

TUAN YUSUF BIN ABD. WAHAB [TANJONG MANIS] minta **MENTERI DALAM NEGERI** menyatakan apakah langkah-langkah menambahkan aset untuk Zon Maritim Tanjong Manis supaya kerja-kerja pemantauan dan penguatkuasaan terhadap pencerobohan oleh nelayan asing dapat dijalankan dengan lebih berkesan lagi.

JAWAPAN

Tuan Yang Di-pertua,

Untuk makluman ahli Yang Berhormat, Zon Maritim Tanjong Manis adalah terletak dibawah seliaan Maritim Negeri Sarawak. Secara keseluruhannya telah terdapat sebanyak 29 buah aset sedia ada. Daripada jumlah ini terdapat sebanyak 7 aset yang terdiri daripada 3 buah kapal dan 4 buah bot yang akan bertugas secara bergilir-gilir pada setiap hari bagi melaksanakan penguatkuasaan di laut sepanjang zon perairan Sarawak termasuk di Zon Maritim Tanjong Manis bagi mengekang kes pencerobohan nelayan asing.

Selain itu, APMM juga turut menempatkan aset-aset tumpangan terutamanya *Operational Patrol Vessel* (OPV) bagi menyokong pengoperasian di Negeri Sarawak. Kekuatan aset penguatkuasaan maritim di zon Tanjong Manis adalah pada kadar yang optimum pada waktu ini di samping terdapat juga aset-aset dari pelbagai jabatan yang boleh diselaraskan secara bersama dalam pengoperasian penguatkuasaan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KETIGA,
PARLIMEN EMPATBELAS**

PERTANYAAN : JAWAB LISAN

**DARIPADA : YB DATO' MOHD. NIZAR BIN HAJI ZAKARIA
(PARIT)**

TARIKH : 11 OGOS 2020 (SELASA)

SOALAN

DATO' MOHD. NIZAR BIN HAJI ZAKARIA [PARIT] minta **MENTERI
DALAM NEGERI** menyatakan:-

- a) Berapa jumlah kes sindiket penjualan kad pengenalan palsu yang telah berjaya dibanteras sepanjang tahun 2019; dan
- b) Adakah Kementerian bercadang untuk menukar kad pengenalan baru dengan ciri keselamatan khas bagi membanteras sindiket penjualan kad pengenalan.

JAWAPAN

Tuan Yang Di-Pertua,

a. Berdasarkan rekod operasi yang dijalankan oleh Jabatan Pendaftaran Negara (JPN) pada tahun 2019 bagi kes penyalahgunaan dokumen pengenalan diri sama ada menggunakan Kad Pengenalan milik orang lain atau memiliki Kad Pengenalan palsu, sebanyak 115 orang telah berjaya ditangkap dan dituduh di bawah Peraturan 25(1)(e) Peraturan-Peraturan Pendaftaran Negara 1990.

b. Kerajaan mengambil maklum dan sentiasa terbuka untuk menambahbaik kualiti MyKad sedia ada dari semasa ke semasa. Oleh yang demikian, keselamatan MyKad adalah terjamin dan tidak terancam oleh sindiket-sindiket yang berniat untuk mengeluarkan MyKad secara tidak teratur.

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL KETIGA
PARLIMEN KEEMPAT BELAS (2020)**

PERTANYAAN : LISAN

DARIPADA : PUAN YEO BEE YIN [BAKRI]

TARIKH : 11 OGOS 2020 (SELASA)

SOALAN

PUAN YEO BEE YIN [BAKRI] minta **MENTERI ALAM SEKITAR DAN AIR** menyatakan sama ada Kementerian akan meneruskan usaha Kerajaan Pakatan Harapan untuk merunding semula perjanjian konsesi dengan Pakar Scieno TW untuk Environmental Quality Monitoring Program (EQMP) yang bernilai RM846 juta dan sekiranya ya, nyatakan penambahbaikan tersebut.

JAWAPAN

Tuan Yang Di-Pertua,

1. Sebagaimana Yang Berhormat sedia maklum, semasa YB memegang jawatan Menteri Tenaga, Sains, Teknologi, Alam Sekitar dan Perubahan Iklim, Yang Berhormat telah meminta perjanjian ini untuk disemak oleh 3 pihak termasuk Majlis Kualiti Alam Sekeliling. Semakan tersebut mendapati perjanjian tersebut adalah teratur.
2. Namun di bawah kepimpinan saya, Kementerian sedang merunding dengan Pakar Scieno TW untuk *Environmental Quality Monitoring Program* (EQMP) untuk ditambahbaik tanpa pertambahan kos dan mendapat nilai tambah daripada perkhidmatan sedia ada.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS
TAHUN 2020**

PERTANYAAN : LISAN

DARIPADA : YB PUAN ALICE LAU KIONG YIENG [LANANG]

TARIKH : 11 OGOS 2020 (SELASA)

SOALAN

PUAN ALICE LAU KIONG YIENG [LANANG] minta **MENTERI SUMBER MANUSIA** menyatakan :

(a) sebab pelaksanaan semula Program Belajar Sambil Bekerja (Train and Place Programme) oleh Pembangunan Sumber Manusia Berhad (HRDF) sedangkan program tersebut telah terbukti gagal dari tahun 2016 hingga 2018; dan

(b) langkah-langkah efektif untuk memastikan kesilapan serupa tidak akan berulang lagi serta langkah-langkah khusus untuk memastikan latihannya relevan dan memberi kesan besar kepada industri berkenaan.

JAWAPAN

Tuan Yang di-Pertua,

1. Pelaksanaan program *Train and Place* yang telah dilaksanakan oleh PSMB sebelum ini memberi fokus untuk memberikan latihan kepada pekerja tempatan bagi meningkatkan kemahiran mereka untuk menggantikan pekerja asing dan seterusnya mengurangkan kebergantungan majikan terhadap pekerja asing.
2. Inisiatif PENJANA HRDF yang sedang dilaksanakan oleh PSMB adalah selaras dengan situasi semasa di mana pandemik COVID-19 telah memberi impak kepada golongan pekerja yang terjejas di samping mengurangkan kadar pengangguran di kalangan belia. PSMB komited dalam memastikan inisiatif ini dapat memberi impak kepada pengurangan kadar pengangguran dengan memberi fokus kepada peningkatan jumlah penempatan pekerjaan dan penjana pendapatan melalui *Place and Train*, *SME Development*, *B40 Development*, *Upskilling and Reskilling* dan Gerak Insan Gemilang (GIG).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGAL KE TIGA,
PARLIMEN EMPATBELAS**

PERTANYAAN : JAWAB LISAN

**DARIPADA : YB DATIN PADUKA DR. TAN YEE KEW
(WANGSA MAJU)**

TARIKH : 11 OGOS 2020 (SELASA)

SOALAN

DATIN PADUKA DR. TAN YEE KEW [WANGSA MAJU] minta **MENTERI DALAM NEGERI** menyatakan sebab pihak polis gagal untuk mematuhi perintah Mahkamah Persekutuan untuk menahan bekas suami M. Indira Gandhi, Muhammad Riduan Abdullah yang telah melarikan diri bersama anak perempuan, Prasana Diksa pada tahun 2009.

JAWAPAN

Tuan Yang Di Pertua,

Sebaik sahaja Mahkamah Tinggi, Ipoh, Perak memberikan hak penjagaan ketiga-tiga anak kepada Puan Indira Gandhi pada 11 Mac 2010, pihak PDRM telah memulakan usaha mencari bekas suami Puan Indira iaitu Encik Patmanathan A/L Krishnan atau Muhammad Ridzuan bin Abdullah dan anak perempuan mereka yang dipercayai berada dalam jagaan Encik Muhammad Ridzuan pada ketika itu.

PDRM juga telah membuat semakan dengan rekod di Jabatan Pendaftaran Negara (JPN) dan telah membuat pemeriksaan di semua alamat yang pernah didiami oleh Encik Muhammad Ridzuan, namun didapati individu tersebut tidak lagi menetap di alamat-alamat tersebut.

NO. SOALAN : 38

Selanjutnya, pihak PDRM melalui Ketua Polis Daerah Ipoh telah membuat siaran akhbar pada 29 April 2016 memohon bantuan masyarakat untuk mengesan Encik Muhammad Ridzuan dan anak perempuan mereka. Namun sehingga kini tiada pihak yang tampil memberikan sebarang maklumat.

Tuan Yang Di Pertua,

Encik Muhammad Ridzuan telah disenaraikan oleh pihak PDRM sebagai orang yang dikehendaki. Selain itu, permohonan Senarai Pekeliling Khas (SPK A) telah dibuat bagi memantau pergerakan keluar masuk keluar negara. Nama subjek juga telah disenaraihitamkan dalam rekod Jabatan Imigresen untuk mengesan serta menangkapnya jika dia cuba melarikan diri keluar negara.

Buat masa ini, berdasarkan siasatan pihak PDRM, dipercayai Encik Muhammad Ridzuan tidak berada di Malaysia serta tidak berada tetap di satu-satu tempat di luar negara tetapi bergerak dari satu tempat ke satu tempat yang lain dalam usaha menghalang daripada dikesan serta menyukarkan pihak berkuasa menjalankan siasatan.

Pihak PDRM juga menjalinkan kerjasama dengan pihak berkuasa negara jiran bagi mengenalpasti lokasi subjek. Pihak PDRM akan mengambil tindakan undang-undang berdasarkan peruntukan sedia ada sekiranya subjek pulang ke negara ini.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE TIGA,
PARLIMEN EMPATBELAS**

PERTANYAAN : JAWAB LISAN

DARIPADA : YB MAHFUZ B. OMAR (POKOK SENA)

TARIKH : 11 OGOS 2020 (SELASA)

SOALAN

DATO' HAJI MAHFUZ BIN HAJI OMAR [POKOK SENA] minta **MENTERI DALAM NEGERI** menyatakan status kes penyiasatan kematian anggota bomba Allahyarham Muhammad Adib Mohd Kassim.

JAWAPAN

Tuan Yang Di Pertua,

Untuk makluman Ahli-ahli Yang Berhormat, Mahkamah Koroner Shah Alam yang bersidang pada 27 September 2019, telah memutuskan punca kematian anggota bomba, Muhammad Adib bin Mohd Kassim, bukanlah disebabkan kemalangan tetapi disebabkan perbuatan jenayah oleh dua (2) orang atau lebih suspek. Berdasarkan keputusan tersebut, PDRM sedang menjalankan siasatan berdasarkan arahan Pejabat Peguam Negara dan mengumpul bukti-bukti yang ada untuk dikemukakan semula kepada pihak pendakwa.

Kertas siasatan telah dirujuk semula ke Jabatan Peguam Negara pada 23 Julai 2020 dengan cadangan-cadangan seperti berikut:

- i. Menuduh 12 orang suspek di bawah Seksyen 143 Kanun Keseksaan yang merusuh dan menyerang jentera bomba; dan
- ii. Mengadakan inkues semula untuk siasatan lanjut jika dipersetujui oleh Peguam Negara di bawah peruntukan Seksyen 339(2) Kanun Prosedur Jenayah.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK WILSON UGAK ANAK
KUMBONG [HULU RAJANG]**

TARIKH : 11 OGOS 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan sekiranya pihak Kementerian ada perancangan untuk membina jalan-jalan di Jalan Tegulang, Belaga, Jalan Metalun, Belaga, Jalan Rumah Juntan dan Jalan Ng. Gaat ke Rumah Tunku, Sg. Gaat.

JAWAPAN

Tuan Yang di-Pertua,

Sepertimana Yang Berhormat sedia maklum, Projek Menaiktaraf Jalan Balak Ke Penempatan Semula Tegulang (Fasa 5), Kapit dan Projek Menaiktaraf Jalan Balak Ke Penempatan Semula Metalun (Fasa 6) telah diluluskan pelaksanaannya di bawah Rolling Plan Ketiga, tahun 2018, RMKe-11 dengan kos keseluruhan berjumlah RM61.0 juta dan RM112.0 juta. Status terkini bagi kedua-dua projek ini adalah di peringkat perlantikan perunding dan dijangka tender pada bulan Mac 2021.

Untuk makluman Yang Berhormat jua, Projek Jalan Rumah Juntan ke Jalan Melekun, Nanga Sut, Kapit, Sarawak telah diluluskan pelaksanaannya di bawah Rolling Plan 2, tahun 2017, (RP2, RMKe-11) dengan kos keseluruhan berjumlah RM60.0 juta. Skop projek ini membina jalan sepanjang 11km spesifikasi JKR R1 dan 3 buah

jambatan. Status terkini bagi projek ini adalah di peringkat perlantikan perunding dan dijangka tender pada bulan Mac 2021.

Untuk makluman Yang Berhormat jua, Projek Jalan dari Nanga Gaat Ke Rumah Tunku, Nanga Sebiro, Sg. Gaat, Bahagian Kapit telah dipohon untuk dilaksanakan di bawah Rolling Plan Pertama, Rancangan Malaysia Keduabelas (RMKe-12), Tahun 2021. Walau bagaimanapun, kelulusan projek ini adalah tertakluk kepada kelulusan oleh pihak Unit Perancang Ekonomi, Jabatan Perdana Menteri dan kedudukan semasa kewangan kerajaan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KETIGA,
PARLIMEN EMPATBELAS**

PERTANYAAN : JAWAB LISAN

**DARIPADA : YB PUAN HAJAH NATRAH BINTI ISMAIL
(SEKIJANG)**

TARIKH : 11 OGOS 2020 (SELASA)

SOALAN

PUAN HAJAH NATRAH BINTI ISMAIL [SEKIJANG] minta **MENTERI DALAM NEGERI** menyatakan mengapakah ibu yang berwarganegara Malaysia menghadapi cabaran dan diskriminasi terhadap permohonan kewarganegaraan anak mereka yang dilahirkan di luar negara.

JAWAPAN

Tuan Yang di-Pertua,

Pemerolehan kewarganegaraan Malaysia bagi individu berumur bawah 21 tahun yang dilahirkan di luar negara kepada ibu bertaraf warganegara Malaysia dengan bapa bertaraf Bukan Warganegara adalah secara pendaftaran di bawah Perkara 15(2) Perlembagaan Persekutuan.

Dalam hal ini, pertimbangan permohonan kewarganegaraan di bawah Perkara 15(2) Perlembagaan Persekutuan turut mengambil kira dasar Kerajaan yang tidak mengiktiraf dwi-kewarganegaraan.

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL KETIGA
PARLIMEN KEEMPAT BELAS (2020)**

PERTANYAAN : LISAN

DARIPADA : TENGKU ZULPURI BIN RAJA PUJI [RAUB]

TARIKH : 11 OGOS 2020 (SELASA)

SOALAN

TENGKU ZULPURI BIN RAJA PUJI [RAUB] minta **MENTERI ALAM SEKITAR DAN AIR** menyatakan dengan detail status projek pembinaan Loji Bilut dan Loji Sementara daripada peruntukan pinjaman Kerajaan Pusat RM18 juta kepada negeri Pahang (Progress, Milestone, Critical Part dan Time Frame).

JAWAPAN

Tuan Yang Di-Pertua,

1. Di dalam *Rolling Plan* Keempat, Rancangan Malaysia Kesebelas (RP4, RMKe-11), Kerajaan Persekutuan telah meluluskan RM18 juta secara pinjaman kepada Kerajaan Negeri Pahang bagi Projek Kerja-Kerja Segera Mengatasi Kekeruhan Yang Tinggi di Loji Rawatan Sg. Bilut, Sg. Semantan dan Sg. Klau. Projek ini adalah di bawah pelaksanaan Kerajaan Negeri Pahang yang dijangka bermula pada September 2020 dan siap pada Ogos 2021. Oleh itu, Kementerian memohon agar Kerajaan Negeri dapat menyegerakan pelaksanaan projek ini demi kesejahteraan rakyat di Negeri Pahang.

Sekian. Terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE TIGA,
PARLIMEN EMPATBELAS**

PERTANYAAN : JAWAB LISAN

**DARIPADA : YB TUAN AWANG HUSAINI BIN SAHARI
(PUTATAN)**

TARIKH : 11 OGOS 2020

SOALAN

TUAN AWANG HUSAINI BIN SAHARI [PUTATAN] minta **MENTERI DALAM NEGERI** menyatakan apakah langkah Kementerian untuk mengatasi masalah kekurangan anggota Polis ketika ini yang mana nisbah antarabangsa memerlukan seorang anggota Polis bersamaan 350 ke 450 orang.

JAWAPAN

Tuan Yang Di Pertua,

Dalam usaha menangani permasalahan kekurangan anggota polis, beberapa langkah serta kaedah telah dikaji oleh PDRM iaitu:-

- i. Pengambilan jawatan Inspektor daripada kalangan SUKESIS yang telah tamat pengajian memandangkan mereka ini telah diberi pendedahan mengenai pengetahuan ilmu dan latihan kepolisan.
- ii. Membuat penambahbaikan kelengkapan latihan dan prasarana pusat-pusat latihan untuk pengambilan berkapasiti besar dapat dilakukan.
- iii. Penugasan secara kolaborasi bersama Jabatan Sukarelawan Malaysia (RELA), Sukarelawan Polis Simpanan (PVR), Skim Rondaan Sukarela (SRS) dan lain-lain bagi menampung kekurangan dalam tempoh sementara sewaktu operasi harian.
- iv. Menukar *mode* rondaan daripada BIT kepada bermotosikal agar radius rondaan diperluaskan

Berdasarkan kepada pengukuran penduduk berbanding perjawatan / kekuatan polis yang ideal, *International Police* (INTERPOL) telah mengeluarkan nisbah iaitu **1:250**. Walau bagaimanapun ianya bukan garis panduan yang mutlak tetapi hanya sebagai penanda aras bagi menentukan kesesuaian nisbah penduduk dengan polis.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS
TAHUN 2020**

PERTANYAAN : LISAN

**DARIPADA : YB TUAN AKMAL NASRULLAH BIN MOHD.
NASIR [JOHOR BAHRU]**

TARIKH : 11 OGOS 2020 (SELASA)

SOALAN

TUAN AKMAL NASRULLAH BIN MOHD. NASIR [JOHOR BAHRU] minta **MENTERI SUMBER MANUSIA** menyatakan usaha untuk mewujudkan lebih banyak peluang pekerjaan bagi menangani masalah pengangguran dalam kalangan anak muda yang terus meningkat, berdasarkan data kadar pengangguran yang telah melonjak kepada 5 peratus pada April lalu ekoran krisis COVID-19.

JAWAPAN

Tuan Yang di-Pertua,

1. Bagi mewujudkan lebih banyak peluang pekerjaan kepada warganegara, beberapa inisiatif sedang dan akan dilaksanakan oleh Kerajaan. Antaranya adalah:

- (i) meningkatkan pelaburan nilai tinggi melalui *foreign direct investment* (FDI) dan *domestic direct investment* (DDI) bagi meningkatkan penghasilan pekerjaan yang bersifat *high value jobs* dan *knowledge worker* (k-worker) agar kadar upah yang tinggi dapat dinikmati oleh golongan ini;

SOALAN NO : 44

- (ii) melaksanakan latihan-latihan kemahiran yang bersifat *internship* seperti latihan Sistem Latihan Dual Nasional (SLDN) untuk meningkatkan kebolehpasaran pelajar;
- (iii) menyediakan insentif-insentif untuk syarikat bagi memperbanyakkan elemen-elemen berteknologi tinggi yang dijangka akan meningkatkan jumlah peluang pekerjaan berkemahiran tinggi; dan
- (iv) mengadakan sesi libat urus bersama industri bagi membincangkan isu sekaligus mengambil langkah-langkah untuk mengurangkan kebergantungan terhadap pekerja asing.

2. Bagi menyokong usaha-usaha di atas, Kerajaan harus menyediakan pekerja-pekerja berkemahiran yang memenuhi keperluan industri. Sehubungan itu, beberapa langkah sedang diambil oleh Kementerian, antaranya:

- (i) program *upskilling* dan *reskilling* disediakan kepada golongan pekerja bagi mempertingkatkan kemahiran mereka bagi menyesuaikan diri dengan perubahan keperluan kerja masa hadapan serta persekitaran global yang semakin kompetitif dan dinamik. Program *upskilling* dan *reskilling* dijalankan secara berterusan supaya kemahiran yang diperolehi sentiasa bersesuaian dengan keperluan industri semasa;
- (ii) Kementerian Sumber Manusia (KSM) melalui Jabatan Pembangunan Kemahiran (JPK), telah membangunkan *National Occupational Skills Standard* (NOSS) bagi 21 sektor ekonomi yang mana telah menjadi rujukan dalam pembangunan program latihan di institusi-institusi latihan awam dan swasta mengikut tahap kemahiran yang diperlukan. NOSS yang dibangunkan dan dipantau secara bersama dengan

Industry Lead Body (ILB) adalah mengikut keperluan industri dan teknologi terkini;

- (iii) memperluaskan akses kepada warganegara untuk mendapat Latihan dan Pendidikan Teknikal dan Vokasional (TVET). Sehingga kini, terdapat lima ratus enam puluh dua (562) buah Institusi Latihan Kemahiran Awam (ILKA) yang telah ditubuhkan di seluruh negara dengan pelbagai kursus kemahiran ditawarkan mengikut keperluan industri; dan
- (iv) KSM dan Kementerian Pengajian Tinggi (KPT) telah diberikan peranan sebagai Pengerusi bersama bagi menerajui Jawatankuasa Kerja Pembangunan Kemahiran dan Bakat (TWG-S) Industry4WRD. Jawatankuasa ini berperanan mengenal pasti keperluan pasaran buruh dan kemahiran yang diperlukan serta menyelaraskan dan melaksanakan usaha-usaha dalam memperkukuhkan kompetensi sumber manusia bagi menghadapi Industri 4.0. Usaha ini dapat dilakukan melalui program *upskilling* dan *reskilling* yang disediakan kepada golongan pelajar kemahiran dan pekerja bagi mempertingkatkan kemajuan sendiri dalam menyesuaikan diri dengan perubahan keperluan kerja masa hadapan (*future jobs*) serta persekitaran global yang semakin kompetitif dan dinamik.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KETIGA,
PARLIMEN EMPATBELAS**

PERTANYAAN : JAWAB LISAN

**DARIPADA : YB PUAN HANNAH YEOH TSEOW SUAN
(SEGAMBUT)**

TARIKH : 11 OGOS 2020 (SELASA)

SOALAN

PUAN HANNAH YEOH TSEOW SUAN [SEGAMBUT] minta **MENTERI DALAM NEGERI** menyatakan apakah perancangan untuk memberikan kewarganegaraan kepada anak-anak yang dilahirkan diluar negara oleh wanita warganegara Malaysia yang berkahwin dengan lelaki warganegara asing dan berapa jumlah permohonan sebegini yang telah diterima, diluluskan dan ditolak sejak tahun 2015.

JAWAPAN

Tuan Yang Di-Pertua,

Pemerolehan kewarganegaraan Malaysia bagi individu berumur bawah 21 tahun yang dilahirkan di luar negara kepada ibu bertaraf warganegara Malaysia dengan bapa bertaraf Bukan Warganegara adalah secara pendaftaran di bawah Perkara 15(2) Perlembagaan Persekutuan. Dalam hal ini, pertimbangan permohonan kewarganegaraan di bawah Perkara 15(2) Perlembagaan Persekutuan turut mengambil kira dasar Kerajaan yang tidak mengiktiraf dwi-kewarganegaraan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS
TAHUN 2020**

PERTANYAAN : LISAN

DARIPADA : YB TUAN M. KULASEGARAN [IPOH BARAT]

TARIKH : 11 OGOS 2020 (SELASA)

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan kaedah-kaedah yang berbeza dan yang telah dikenal pasti untuk memastikan bahawa inisiatif '*Place and Train*' ini membuahkan kejayaan sedangkan KWPSM telah melancarkan inisiatif yang serupa seperti '*Place and Train*' sebelum PRU14 yang dikenali sebagai '*Train and Place*', tetapi terbukti tidak berjaya setelah berjuta-juta ringgit telah dibelanjakan oleh Kerajaan.

JAWAPAN

Tuan Yang di-Pertua,

1. Pelaksanaan *Place and Train* di bawah Inisitif PENJANA HRDF adalah selaras dengan situasi semasa di mana pandemik COVID-19 telah memberi impak kepada golongan pekerja yang terjejas di samping mengurangkan kadar pengangguran di kalangan belia. PSMB komited dalam memastikan skim ini dapat memmberi impak kepada pengurangan kadar pengangguran.
2. Di bawah pentadbiran Kerajaan baharu, PSMB telah menyemak semula mekanisma skim ini dengan menambahbaik ekosistem latihan bagi memastikan bahawa setiap latihan yang dijalankan adalah memenuhi keperluan industri dan memberi nilai tambah kepada pelatih untuk terus kekal berdaya saing dalam pekerjaan yang diceburi. PSMB juga akan mengawal selia setiap latihan dijalankan agar tiada ketirisan dalam melaksanakan latihan secara efektif.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI AHMAD FAIZAL
BIN DATO' AZUMU [TAMBUN]**

TARIKH : 11 OGOS 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan berdasarkan statistik yang dikeluarkan oleh Pusat Maklumat Harta Tanah Negara (NAPIC), sebanyak 31,092 unit rumah tidak terjual pada suku tahun ketiga 2019 dan 16.5% atau 5,126 unit adalah dari negeri Perak. Merujuk kepada statistik tersebut, diminta Menteri Perumahan dan Kerajaan Tempatan mengulas sekiranya Kementerian ada usaha-usaha untuk menyelesaikan masalah perumahan yang tidak terjual di Negeri Perak.

JAWAPAN

Tuan Yang di-Pertua,

1. Untuk makluman Yang Berhormat, berdasarkan statistik Pusat Maklumat Harta Tanah Negara (NAPIC), sebanyak 5,126 (40.15%) unit rumah tidak terjual daripada 12,766 unit rumah yang dilancar telah dicatatkan pada suku ketiga tahun 2019 di negeri Perak. Statistik terkini bagi suku pertama tahun 2020 menunjukkan pengurangan iaitu sebanyak 4,919 (31.58%) unit rumah tidak terjual daripada 15,574 yang dilancarkan di negeri Perak.

2. Untuk makluman Yang Berhormat juga, antara punca berlakunya lambakan rumah tidak terjual adalah seperti berikut:

- a) Ketidakmampuan membeli rumah mengikut harga pasaran;
- b) Ketidaksepadanan antara penawaran dan permintaan rumah mengikut lokasi; dan
- c) Ketiadaan sistem bersepadu bagi memastikan kesepadanan di antara penawaran dan permintaan.

3. Antara usaha-usaha KPKT untuk menyelesaikan masalah perumahan yang tidak terjual di seluruh negara termasuklah di Negeri Perak adalah seperti berikut:

- a) Melaksanakan Kajian Analitis Data Raya Perumahan yang bertujuan mendapatkan gambaran sebenar mengenai pengurusan perumahan di Malaysia. Kajian ini akan dijadikan sebagai input bagi pembangunan platform pusat pengumpulan data hartanah yang meliputi permintaan dan penawaran untuk membantu membuat keputusan di peringkat Kerajaan Persekutuan dan Kerajaan Negeri serta penyediaan dasar dan perancangan perumahan negara yang lebih komprehensif;

- b) **Penetapan harga siling rumah mampu milik** di bandar dan luar bandar bagi setiap negeri di bawah **Dasar Perumahan Mampu Milik Negara (DRMM)**, berdasarkan harga rumah median semasa iaitu menggunakan ketetapan gandaan median (*median multiple*). Pengiraan harga rumah ini berdasarkan tiga kali ganda pendapatan isi rumah penengah (median) penduduk di bandar dan luar bandar setiap negeri. Penentuan harga siling ini boleh dijadikan garis panduan kepada pemaju bahkan Kerajaan Negeri dalam perancangan pembangunan perumahan yang mampu dimiliki oleh golongan sasar;
 - c) Membangunkan Housing Integrated Management System (HIMS) yang bertindak sebagai 'One Stop Centre' secara atas talian bagi urusan di bawah Akta Pemajuan Perumahan (Kawalan dan Pelesenan) 1966 (Akta 118) (pengeluaran lesen, kawalan dan pemantauan projek serta penguatkuasaan) dan pengemaskinian maklumat pemajuan projek perumahan swasta. Sistem ini dijangka siap pada April 2021; dan
 - d) **Menambah baik koordinasi antara pembangunan perumahan dan pengangkutan untuk kualiti kehidupan yang lebih baik.** Ini merupakan antara fokus utama dalam Dasar Perumahan Negara (2018-2025) di mana KPKT bersama dengan *stakeholders* industri perumahan yang berkaitan akan bekerjasama dalam memastikan perancangan pengangkutan dan perumahan diselaraskan di peringkat nasional dan sub-nasional supaya perancangan memenuhi keperluan sesuatu kawasan dan pembangunan bandar yang terancang memandangkan pengangkutan merupakan salah satu elemen yang menentukan permintaan pemilikan perumahan di sesuatu lokasi.
3. Selain itu, antara usaha lain Kerajaan melalui Kementerian Kewangan bagi mengatasi masalah lebihan bekalan rumah kediaman

adalah melalui Pelan Jana Semula Ekonomi Negara (PENJANA) 2020 yang diumumkan oleh YAB Perdana Menteri Malaysia pada 5 Jun 2020 bagi sektor hartanah. Kerajaan telah bersetuju dengan 3 inisiatif untuk merancakkan semula pasaran hartanah seperti berikut:

- a) Kempen Pemilikan Rumah / *Home Ownership Campaign* (HOC) 2020;
- b) Pengecualian Cukai Keuntungan Harta Tanah (CKHT); dan
- c) Had Pembiayaan Bagi Pinjaman Perumahan / *Loan to Value* (LTV).

4. KPKT juga sentiasa bekerjasama rapat dengan Lembaga Perumahan Hartanah Perak (LPHP) untuk menyelesaikan isu-isu perumahan termasuklah isu rumah tidak terjual di negeri Perak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE TIGA,
PARLIMEN EMPATBELAS**

PERTANYAAN : JAWAB LISAN

DARIPADA : YB TUAN AHMAD JOHNNIE BIN ZAWAWI (IGAN)

TARIKH : 11 OGOS 2020 (SELASA)

SOALAN

TUAN AHMAD JOHNNIE BIN ZAWAWI [IGAN] minta **MENTERI DALAM NEGERI** menyatakan apakah pihak Kementerian mempunyai perancangan untuk membina Ibu Pejabat Polis Daerah Daro (IPD) yang baru memandangkan IPD yang ada sekarang ini sudah terlalu lama dan daif serta tidak mencukupi untuk menempatkan pegawai sedia ada.

JAWAPAN

Tuan Yang Di Pertua,

Polis Diraja Malaysia (PDRM) telah menyenaraikan pembangunan baru khususnya bagi menggantikan bangunan-bangunan lama yang mana ianya tidak lagi ekonomik untuk diselenggara dan dibaiki. Perancangan pembinaan IPD Matu Daro yang baharu telah disenaraikan dalam Rancangan Pelaksanaan Program/Projek Pelan Strategik PDRM (PSPDRM) tahun 2021 hingga 2025 di bawah pakej Rancangan Malaysia Lima Tahun dalam usaha PDRM untuk memenuhi keperluan dan meningkatkan imej serta tahap rasa selamat penduduk. Pada masa ini, pihak Kementerian dan PDRM sedang memberi penumpuan dan keutamaan bagi pembinaan projek sedia ada serta kerja-kerja menaiktaraf premis PDRM yang uzur. Walau bagaimanapun, cadangan projek ini akan dimasukkan dalam *Rolling Plan* (RP) berikutnya setelah semakan keutamaan dibuat dan tertakluk kepada kelulusan projek pembangunan di bawah Rancangan Malaysia Ke-12 oleh Unit Perancang Ekonomi (UPE), Jabatan Perdana Menteri.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 11 OGOS 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan berapa unit rumah mampu milik telah dilancarkan selepas penandatanganan MOU dengan 6 buah syarikat untuk berusaha sama dalam projek merealisasikan 1 juta rumah dalam 10 tahun.

JAWAPAN

Tuan Yang di-Pertua,

1. Untuk makluman Yang Berhormat, perbincangan dengan syarikat-syarikat dari Republik Rakyat China yang telah menandatangani MOU bersama Syarikat Perumahan Negara Berhad (SPNB) telah dijalankan dari aspek pembiayaan projek dan lain-lain bentuk kerjasama yang membawa manfaat kepada kedua-dua pihak. Walau bagaimanapun, perbincangan berkenaan telah tertangguh akibat pandemik COVID-19 dan pada masa ini tempoh MOU berkenaan telah luput. Setakat ini hanya satu syarikat dari Republik Rakyat China yang berminat untuk menjalin kolaborasi dengan SPNB dari segi pembiayaan projek perumahan SPNB dan juga peluang perniagaan baharu.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE TIGA
PARLIMEN EMPATBELAS**

PERTANYAAN : JAWAB LISAN

**DARIPADA : YB TUAN AHMAD FADHLI BIN SHAARI
(PASIR MAS)**

TARIKH : 11 OGOS 2020

SOALAN

TUAN AHMAD FADHLI BIN SHAARI [PASIR MAS] minta **MENTERI DALAM NEGERI** menyatakan perkembangan siasatan kes kematian Allahyarham Muhammad Adib Mohd Kassim, seorang anggota bomba yang terkorban ketika menjalankan tugas pada tahun 2018.

JAWAPAN

Tuan Yang Di Pertua,

Untuk makluman Ahli-ahli Yang Berhormat, Mahkamah Koroner Shah Alam yang bersidang pada 27 September 2019, telah memutuskan punca kematian anggota bomba, Muhammad Adib bin Mohd Kassim, bukanlah disebabkan kemalangan tetapi disebabkan perbuatan jenayah oleh dua (2) orang atau lebih suspek. Berdasarkan keputusan tersebut, PDRM sedang menjalankan siasatan berdasarkan arahan Pejabat Peguam Negara dan mengumpul bukti-bukti yang ada untuk dikemukakan semula kepada pihak pendakwaan.

Kertas siasatan telah dirujuk semula ke Jabatan Peguam Negara pada 23 Julai 2020 dengan cadangan-cadangan seperti berikut:

- i. Menuduh 12 orang suspek di bawah Seksyen 143 Kanun Keseksaan yang merusuh dan menyerang jentera bomba; dan
- ii. Mengadakan inkues semula untuk siasatan lanjut jika dipersetujui oleh Peguam Negara di bawah peruntukan Seksyen 339(2) Kanun Prosedur Jenayah.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS
TAHUN 2020**

PERTANYAAN : LISAN

**DARIPADA : YB TUAN JUGAH ANAK MUYANG @ TAMBAT
[LUBOK ANTU]**

TARIKH : 11 OGOS 2020 (SELASA)

SOALAN

Tuan Jugah anak Muyang @ Tambat [Lubok Antu] minta **MENTERI SUMBER MANUSIA** menyatakan adakah Kerajaan mempunyai rancangan untuk menubuhkan kerangka perundangan atau pentadbiran bagi menangani isu kebanjiran pekerja warga asing yang masuk ke dalam negara.

JAWAPAN

Dewan Yang Mulia,

1. Untuk makluman Yang Berhormat, Kerajaan tidak berhasrat untuk mengadakan kerangka perundangan yang spesifik bagi menangani isu banjir pekerja asing di Malaysia. Ini kerana Kerajaan telahpun menubuhkan satu Jawatankuasa Kabinet Mengenai Pengurusan Pekerja Bukan Warganegara yang akan membincangkan secara spesifik dasar-dasar berhubung pengajian pekerja bukan warganegara, kawalan dan penguatkuasaan serta peningkatan kebolehpasaran (*employability*) guna tenaga tempatan.

2. Selain itu, Kerajaan juga sudahpun mempunyai Akta-akta sedia ada dalam menangani isu-isu kemasukan pekerja asing seperti Akta Imigresen 1959/63, Akta Kerja 1955 berhubung pengajian pekerja dan sebagainya. Seterusnya mekanisme permohonan dan kelulusan berdasarkan konsep *demand and supply* di bawah kawalan dan seliaan Jabatan Tenaga Kerja dan Kementerian Dalam Negeri adalah memadai bagi memastikan kemasukan pekerja asing adalah telus dan mengikut keperluan sebenar industri.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 11 OGOS 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan bagaimanakah pihak Kerajaan dapat membantu pekebun-pekebun kecil bagi membentuk kumpulan ekonomi yang memberi impak besar kepada pembangunan negara.

JAWAPAN

Tuan Yang di-Pertua,

Untuk makluman Yang Berhormat, Kerajaan melalui RISDA telah mengambil beberapa langkah untuk memastikan pekebun-pekebun kecil juga berada di dalam kumpulan ekonomi yang memberi impak besar kepada pembangunan negara.

Diantara langkah-langkah tersebut ialah melaksana program-program seperti berikut:

1) Program Infrastruktur Pemasaran iaitu RISDA membangunkan Depo Belian dan Pusat Timbang & Stor untuk membolehkan pekebun kecil menjual hasil kebun mereka secara berkelompok. Penjualan secara berkelompok ini dapat meningkatkan harga jualan seterusnya mendorong pekebun kecil untuk terus komited meningkatkan produktiviti kebun.

2) Program Pembangunan Usahawan iaitu Usahawan bimbingan RISDA diberi kursus kemahiran secara berterusan bagi menguruskan perniagaan serta meminimumkan risiko kegagalan. Agenda pembangunan usahawan ini melibatkan 5 komponen utama iaitu *Recruitment, Upskilling, Evaluation, Reward* dan *Restrategize*.

3) Program Pembangunan Produk/ Perkhidmatan iaitu Usahawan pekebun kecil di bawah bimbingan RISDA diberi penekanan dalam membangunkan produk/perkhidmatan mereka melalui program AKtiviti Ekonomi Tambahan (AET), proram Pembungkusan dan Pelabelan, program Pensijilan Halal dan Program *Groom Big*.

4) Program Pemasaran di mana RISDA membantu usahawan pekebun kecil yang dibimbing untuk memasarkan produk/perkhidmatan melalui kaedah pemasaran secara *online* dan *offline*. Pemasaran secara *online* dipergiat melalui kerjasama dengan pelbagai pemain industri yang berpengalaman dalam bidang pemasaran seperti Shopee, e-Desa dan Kedai Raya. Manakala secara *offline* pula adalah menggunakan outlet RisSMart iaitu infrastruktur yang dibina oleh RISDA. Jaringan pemasaran produk turut diperkasa melalui kerjasama antara RISDA dan saluran pemasaran seperti Global Ikhwan Sdn. Bhd.

5) Program Pembangunan Hasil Baharu Agro Makanan iaitu RISDA menumpukan kepada pembangunan hasil baharu yang memfokuskan kepada bidang Agro Makanan yang dilaksana secara Jangka Panjang, Jangka Pendek dan Ternakan. Sebanyak RM 10 juta diperuntukan untuk program ini yang dapat memberi manfaat kepada 500 pekebun kecil.

Dengan langkah-langkah ini diharapkan ianya dapat membantu pekebun-pekebun kecil boleh berada dalam kumpulan ekonomi yang memberi impak besar kepada pembangunan negara.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN KASTHURIRAANI A/P PATTO
[BATU KAWAN]**

TARIKH : 11 OGOS 2020 (SELASA)

SOALAN

PUAN KASTHURIRAANI A/P PATTO [BATU KAWAN] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan jumlah wanita mengikut kaum etnik, umur dan negeri yang telah berdaftar perniagaan dengan SSM, jenis perniagaan, bilangan yang mendapat pinjaman mikro-kredit dan sumber pinjaman, perniagaan yang dormant dan aktif serta senaraikan semua bantuan kewangan, geran dan sokongan bagi golongan wanita dan ibu tunggal untuk menjana pendapatan mereka selepas COVID-19. Adakah Kerajaan akan menerapkan polisi “gender inclusiveness” yang digunakan oleh Kerajaan negeri Pulau Pinang dan gender responsive budgeting” dalam perangkaan polisi dan belanjawan bagi golongan wanita.

JAWAPAN

Yang di-Pertua,

1. Berdasarkan kepada rekod yang disimpan di Suruhanjaya Syarikat Malaysia (SSM) sehingga 31 Julai 2020, secara keseluruhannya seramai 1,971,878 pemilik perniagaan wanita telah didaftarkan di SSM. Daripada jumlah tersebut, seramai 608,729 daripada mereka masih menjalankan perniagaan dan masih aktif. Manakala seramai 1,363,149 orang lagi tidak memperbaharui pendaftaran perniagaan mereka.
2. Pecahan statistik mengikut kaum etnik dan negeri pula adalah seperti berikut:

(a) Statistik pemilik perniagaan wanita mengikut kaum etnik:

Bil.	Kategori kaum	Jumlah
1.	Melayu	1,153,709
2.	Cina	604,403
3.	India	160,808
4.	Lain-lain	52,958
Jumlah keseluruhan		1,971,878

(b) Statistik jumlah perniagaan pemilikan wanita mengikut negeri:

Bil.	Negeri	Jumlah
1.	Perlis	23,743
2.	Kedah	150,426
3.	Pulau Pinang	145,112
4.	Perak	174,847
5.	Selangor	530,638
6.	Kuala Lumpur	272,335
7.	Putrajaya	5,305
8.	Negeri Sembilan	105,495
9.	Melaka	79,749
10.	Johor	288,420
11.	Pahang	126,057
12.	Terengganu	97,610
13.	Kelantan	130,420
14.	Labuan	7,682
Jumlah keseluruhan		2,137,839

3. Statistik yang dinyatakan adalah berdasarkan kepada rekod yang disimpan di SSM yang tertakluk di bawah undang-undang yang ditadbir olehnya sahaja. Berkenaan maklumat-maklumat lain seperti polisi *gender inclusiveness* dan bilangan perniagaan yang mendapat bantuan dana kewangan sama ada dalam bentuk pinjaman mikro kredit atau lain-lain bentuk bantuan kewangan berserta dengan sumbernya, ia adalah di bawah bidang kuasa kementerian atau agensi lain.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE TIGA,
PARLIMEN EMPATBELAS**

PERTANYAAN : JAWAB LISAN

**DARIPADA : YB TUAN SIVARASA A/L K.RASIAH (SUNGAI
BULOH)**

TARIKH : 11 OGOS 2020 (SELASA)

SOALAN

TUAN R. SIVARASA [SUNGAI BULOH] minta **MENTERI DALAM NEGERI** menyatakan sama ada Kerajaan baru akan meneruskan pembentangan Rang Undang Undang Suruhanjaya Bebas Aduan dan Salah Laku Polis (IPCMC) serta memansuh atau meminda Akta Hasutan 1948.

JAWAPAN

Tuan Yang Di Pertua,

Mesyuarat Jemaah Menteri pada 1 April 2020 bersetuju supaya tanggungjawab RUU IPCMC diserahkan kepada Kementerian Dalam Negeri (KDN). Selaras dengan keputusan Jemaah Menteri, KDN telah mengambil inisiatif dengan menubuhkan sebuah Jawatankuasa Khas Kajian (JKK) yang turut dianggotai oleh wakil Polis Diraja Malaysia (PDRM). Rang undang-undang baharu ini dicadang untuk dibentangkan di sesi Dewan Rakyat setelah mendapat persetujuan Jemaah Menteri.

Penyebaran maklumat atau berita yang berunsur hasutan melalui media sosial secara tidak bertanggungjawab dalam kalangan rakyat Malaysia dikhuatiri boleh menjejaskan keselamatan dan ketenteraman awam. Sehubungan itu, Kementerian berpandangan bahawa Akta Hasutan 1948 masih relevan dengan mengambil kira struktur masyarakat Malaysia yang terdiri daripada pelbagai agama dan bangsa.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN SIM CHEE KEONG [BUKIT MERTA JAM]

TARIKH : 11 OGOS 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan senarai **jumlah lesen arak** kelas runcit di seluruh negara mengikut pecahan **PBT dan negeri**.

JAWAPAN

Tuan Yang di-Pertua,

1. Untuk makluman Yang Berhormat, melalui data yang diperolehi daripada Kerajaan Negeri, **jumlah lesen arak kelas runcit yang telah dikeluarkan sehingga 1 Julai 2020 ialah sebanyak 5,791 lesen**. Berdasarkan jumlah tersebut, negeri yang paling banyak mengeluarkan lesen arak kelas runcit adalah negeri Selangor. Jumlah lesen arak kelas runcit yang dikeluarkan mengikut negeri adalah seperti berikut :

Jumlah Lesen Arak Kelas Runcit Mengikut Negeri

Bil.	Negeri	Jumlah lesen
1.	Selangor	1,721
2.	Sarawak	1,212
3.	Johor	558
4.	Wilayah Persekutuan	537
5.	Pulau Pinang	413
6.	Sabah	400
7.	Perak	296
8.	Negeri Sembilan	216
9.	Pahang	210
10.	Melaka	109
11.	Kedah	95
12.	Perlis	12
13.	Kelantan	7
14.	Terengganu	5
JUMLAH		5,791

2. Manakala jumlah lesen arak kelas runcit yang dikeluarkan mengikut pecahan PBT adalah seperti berikut :

Senarai Jumlah Lesen Arak Kelas Runcit Mengikut PBT Dan Negeri

Bil.	Negeri	PBT/Pej. Daerah & Tanah	Bilangan Lesen mengikut PBT/Pej. Daerah & Tanah	Jumlah Lesen Mengikut Negeri
1.	Perlis	MP Kangar	12	12
2.	Kedah	MB Alor Setar	2	95
		MP Sungai Petani	36	
		MP Kulim	38	
		MP Kubang Pasu	16	
		MD Baling	3	
3.	Kelantan	MP Kota Bharu	3	7
		MD Pasir Mas	1	
		MD Tanah Merah	1	
		MD Gua Musang	2	
4.	Pulau Pinang	MB Pulau Pinang	215	413
		MB Seberang Perai	198	
5.	Negeri Sembilan	Seremban	119	216
		Port Dickson	37	
		Jempol	20	
		Jelevu	8	
		Kuala Pilah	12	
		Rembau	3	
		Tampin	17	
6.	Pahang	MP Kuantan	44	210
		MP Temerloh	27	
		MP Bentong	44	
		MD Cameron Highland	38	
		MD Bera	16	
		MD Rompin	1	
		MD Jerantut	14	
		MD Maran	3	
		MD Raub	13	
		MD Lipis	10	
7.	Terengganu	MB Kuala Terengganu	1	5
		MP Kemaman	2	
		MP Dungun	1	
		MD Besut	1	
8.	Melaka	Melaka Tengah	77	109
		Alor Gajah	23	
		Jasin	9	
9.	Johor	Johor Bahru	278	558
		Muar	27	

Bil.	Negeri	PBT/Pej. Daerah & Tanah	Bilangan Lesen mengikut PBT/Pej. Daerah & Tanah	Jumlah Lesen Mengikut Negeri
		Batu Pahat	42	
		Kluang	73	
		Kulai	46	
		Segamat	35	
		Tangkak	22	
		Pontian	14	
		Kota Tinggi	13	
		Mersing	8	
10.	Perak	Perak Tengah	1	296
		Bagan Datuk	17	
		Kuala Kangsar	16	
		Kinta	83	
		Mualim	6	
		Larut	33	
		Manjung	45	
		Hulu Perak	10	
		Kampar	22	
		Hilir Perak	32	
		Kerian	13	
		Batang Padang	18	
11.	Wilayah Persekutuan	DBKL	494	537
		Perbadanan Labuan	43	
12.	Sarawak	DB Kuching Utara	33	1,212
		Lemb. Kemajuan Bintulu	39	
		MB Kuching Selatan	44	
		MB Miri	117	
		MP Kota Samarahan	64	
		MP Padawan	189	
		MP Sibu	28	
		MD Lubok Antu	30	
		MD Subis	76	
		MD Lundu	73	
		MD Kapit	22	
		MD Maradong & Julau	13	
		MD Marudi	8	
		MD Bau	6	
		MD Simunjan	10	
		MP Sibu	93	
		MD Betong	5	
		MD Saratok	28	
		MD Serian	91	

Bil.	Negeri	PBT/Pej. Daerah & Tanah	Bilangan Lesen mengikut PBT/Pej. Daerah & Tanah	Jumlah Lesen Mengikut Negeri
		MD Sarikei	26	
		MD Matu Daro	5	
		MD Kanowit	38	
		MD Limbang	11	
		MD Lawas	4	
		MD Dalat & Mukah	67	
		MD Sri Aman	92	
13.	Sabah	Dewan Bandaraya Kota Kinabalu	86	400
		Majlis Perbandaran Tawau	57	
		Majlis Daerah Putatan	13	
		Majlis Daerah Beluran	10	
		PD Lahad Datu	49	
		PD Keningau	9	
		PD Tuaran	22	
		PD Papar	8	
		PD Kudat, Kecil Banggi, Matunggong, Pitas, Kota Marudu	71	
		PD Semporna	6	
		PD Tenom	5	
		PD Beaufort	2	
		PD Sipitang	12	
		PD Ranau	22	
		PD Kunak	12	
		PD Tambunan	6	
		PD Telupid	10	
14.	Selangor	Petaling	1,239	1,721
		Klang	179	
		Gombak	90	
		Sepang	79	
		Kuala Langat	85	
		Kuala Selangor	33	
		Sabak Bernam	16	
JUMLAH				5,791 lesen

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS
TAHUN 2020**

PERTANYAAN : LISAN

DARIPADA : YB TUAN LIM LIP ENG [KEPONG]

TARIKH : 11 OGOS 2020 (SELASA)

SOALAN

TUAN LIM LIP ENG [KEPONG] minta **MENTERI SUMBER MANUSIA** menyatakan langkah segera untuk mengatasi isu kekurangan pekerja asing bagi banyak sektor industri yang berada pada tahap kritikal. Berapakah bilangan pekerja asing tanpa izin telah hantar pulang ke negara asal mereka sejak bermulanya penularan wabak COVID-19 serta kos yang ditanggung oleh Kerajaan.

JAWAPAN

Tuan Yang di-Pertua,

1. Kerajaan pada masa ini telah membekukan pengambilan pekerja asing baharu mengambil kira penularan wabak pandemik COVID-19 serta impak pandemik tersebut kepada pasaran pekerjaan negara. Tempoh ini akan digunakan oleh Kementerian ini untuk mengambil pendekatan “*all out*” bagi memastikan pencari kerja warganegara diserapkan dalam pasaran pekerjaan bagi mengurangkan kadar pengangguran dan menjamin kelangsungan hidup rakyat.

2. Bagi membantu industri yang memerlukan khidmat pekerja asing sedia ada yang terkesan akibat pandemik ini, Kerajaan bermula 10 Jun 2020 telah menjalankan program pertukaran majikan bagi membolehkan majikan yang tidak dapat meneruskan penggajian pekerja asing mereka supaya menyerahkan pekerja-pekerja tersebut kepada majikan baharu. Proses ini dikendalikan sepenuhnya oleh Jabatan Tenaga Kerja Semenanjung Malaysia dan Kementerian Dalam Negeri serta hanya untuk sektor pekerjaan yang sama. Pada masa yang sama, Kerajaan juga sedang meneliti pelbagai aspek dalam menambah baik pengurusan pengambilan pekerja asing secara holistik.

Sekian, terima kasih.